


館閣漫錄

聖
成化

華古籍保



館閣漫錄卷之五 起成化元年止成化六年

不二齋校梓

成化元年二月戊寅朔 丁亥釋奠先師孔子遣少

保吏部尚書兼華蓋殿大學士李賢行禮 甲午

上祭先農之神遂躬耕籍田命定襄伯郭登隆平伯

張祐廣平侯袁瑄各行五推禮少保吏部尚書華蓋

殿大學士李賢禮部尚書姚夔兵部尚書王竑工部

尚書白圭左侍郎兼學士陳文右侍郎兼學士彭時

吏部右侍郎尹旻戶部左侍郎楊鼎通政使張文質

各行九推禮 巳亥准詹事府少詹事兼國子監祭

耕籍田

酒司馬恂等奏令本監博士助教等官照舊制懸帶牙牌仍朔望朝參 甲辰修撰陳鑑居憂召修 實錄固請終制許之

三月戊申朔 已酉勅吏部陞太子少保吏部尚書王翱為太子太保兼吏部尚書吏部左侍郎兼學士陳文為禮部尚書兼職如故 癸丑陞修撰曹恩為尚寶司少卿童緣為春坊右諭德編修丘濬為侍講檢討邢讓為修撰以各官九年滿也前此修撰秩滿陞一級得侍讀侍講至是修撰王猷以將秩滿謀於大學士李賢欲為已地故有是命後遂為例 丁巳

幸學

上視國子監是日 上具皮弁服躬謁先師孔子行四拜禮命少保吏部尚書華蓋殿大學士李賢太子少保戶部尚書馬昂兵部尚書王竑工部尚書白圭吏部左侍郎兼學士陳文吏部右侍郎兼學士彭時戶部左侍郎楊鼎兵部左侍郎王復分獻四配十哲兩廡翰林官俱陪祀禮畢幸彝倫堂祭酒司馬恂司業張業講書畢 駕還宮 已未詔宴孔顏孟氏子孫衍聖公孔弘緒等于禮部故事視學祭酒以下皆宴于奉天門至是免宴以弘緒等遠來特宴之 已巳陞左春坊左庶子兼侍講王俱為學士

四月丁丑朔 癸未陞編修李本為侍讀以九年秩滿也 庚寅兵部尚書王竑等言清理武選貼黃例用本部并都察院堂上官一員提督今會官舉修撰岳正堪任侍郎禮科都給事中張寧堪任都御史請旨簡用內批會官推舉多徇私情不從公道止令侍郎王復不妨部事同都御史林聰清黃自今內外缺官不必會保岳正張寧陞外任於是正陞興化府知府寧汀洲府知府正等之薦有惡之者故命陞外任然二人皆有時名正自甘肅謫戍回既復職當道者畧不見薦用之意正屢出怨言遂致觸忤寧字靖之

賜扇

浙江海鹽人第進士授給事中性聰敏善於章奏然恃才矜肆人亦厭之至汀洲簡靜為治未幾以病免甲辰賜大臣扇舊例端陽賜扇均及百官景泰中始命工別製扇賜經筵侍班大臣及諸講官不與經筵者則否天順以後徧賜大臣雖不與經筵者亦與而學士或有不得者失初意矣

五月丁未朔 巳酉賜少保吏部尚書兼華蓋殿大學士李賢禮部尚書兼學士陳文兵部尚書兼學士彭時誥命并陞授階勲 復倪謙為學士閑住謙上書言天順三年奉命充順天府鄉試官都御史寇深

厲取其子林又有從學生員章紱者亦以私厲臣皆
不從而順天府丞王晉懼深勢言林在選為臣所黜
深陰結錦衣衛指揮逯杲攬撫臣罪云天順元年遣
祭遼簡王私受守墳庶人金銀器物及紱姊夫王英
為庶人寄紗段諸物與臣下錦衣衛獄不勝考訊遂
自誣服除名戍邊今幸遇登極恩釋為民而事未辯
乞置對以雪冤抑 上以事在赦前不問而復謙職
閑住

七月丙午朔 戊午命侍讀丘濬編修彭華為應天
府鄉試考官

八月丙子朔 丁丑釋奠先師孔子遣少保吏部尚
書兼華蓋殿大學士李賢行禮 壬午命太常寺少
卿兼侍讀學士吳節學士柯潛為順天鄉試考官賜
宴于本府 辛卯傅恭傳奉 聖旨陞文思院副使
李景華陳敷任傑為中書舍人御用監書辦景華等
以黃緣內侍入內府數引技藝之人進用寵幸日加
始以雜流躡陞清華之職 辛丑擢庶吉士李東陽
倪岳謝鐸焦芳陳音為編修吳希賢為檢討劉淳為
中書舍人仍舊譯字張敷華等九人為各部主事
十月乙亥朔 辛丑陞吏部右侍郎兼學士彭時為

兵部尚書兼職如故時辭謝 上曰朝廷陞職自有公論卿又在內閣故茲陞任何以辭為

十二月甲戌朔 乙亥陞侍讀周洪謨為侍讀學士以九年職滿也 乙酉陞侍讀李本戶部郎中陳俊為南京太常少卿 甲午少保吏部尚書兼華蓋殿大學士李賢奏近因禮部言氣燠失調天不降雪乞令文武群臣修省祈禱臣切思陰陽不和固大臣不能盡職所致而大臣中其咎最重者惟臣一人蓋五府六部都察院各理其事臣居內閣不但專掌制勅文書又任輔導之職與聞國政天之降災示變非臣

之咎而誰咎且臣本凡庸誤蒙 先帝擢用蓋彼時

翰林院適無老成儒臣以臣備數八年之間未嘗自

安 皇上嗣登寶位念臣青宮隨侍之舊仍前委任

屢嘗懇乞退休未蒙矜允况近年天象屢變水旱相

仍皆臣不職所致前代居公孤之位者多因災異策

免今文臣中惟臣叨濫少保之職而又不為士論所

取雖無災變亦當罷去况有此災變尚可恬然自安

而不退乎今內閣不為無人伏望 皇上察臣情懇

賜臣罷歸田里則天意可回災變可弭而陰陽自和

矣奏入有 旨修德弭災上下同之引咎自歸已見

誠意所辭不允 庚子命直隸容城縣立祠祀元儒
劉因初國子監助教李伸奏請因及國朝故禮部左
侍郎兼學士薛瑄從祀歷述因之墓表祠記與薦因
從祀章奏謂因物故太早復當兵燹之餘故其著述
多殘缺不備觀其遺文所載河圖辯太極圖後記諸
篇皆足以繼往開來有功名教不必在於著述之多
而况當時請列因從祀者皆以許衡吳澄並稱衡既
從祀於當時而澄亦褒崇於今日獨因未得通祀實
為缺典謂瑄潛心體道篤志力行所著讀書錄河汾
集諸書足以發明往來垂惠後學亦宜從祀先是山

東濟南知府陳銓亦以瑄宜從祀為言事下少保吏
部尚書兼華蓋殿大學士李賢等奏有傳道之大功
者然後可享天下之通祀苟非道足以繼往哲言足
以淑來世則人心有所不服今雖幸進後必有舉而
黜之者矣請會本院儒臣公議其當於是太常少卿
兼侍講學士劉定之等議曰謹按元儒劉因德性剛
正學識明悟所作詩文理趣出人意外進退之際
安於義命是以裕宗不能留世祖不能致可謂賢矣
然而建言者遽欲以因列諸孔廟從祀則事體甚重
不可以不辨建言者以顏子未嘗著書而配享孔子

不可以因未嘗著書而不之取夫顏子何可當也孔子之道傳之顏子後世取信於孔子之言其言具於論語載於中庸見於孟子存於易繫辭等書不一而足雖顏子未嘗著書何害其為傳道哉譬如蕭何無戰功而高祖取為漢臣之首房玄齡無戰功而太宗取為唐臣之首所謂知臣莫若君知弟子莫若師者此之謂也今以因未著書而仰攀顏子為比則是人臣無汗馬之功皆得攀蕭房為比惡有是理也哉建言者又謂從祀諸賢其中亦有可疵議者因無可疵柰何反不得從祀夫及門速肖之徒其中雖間有可

議然皆親受業於聖人高者名列四科餘者亦皆身通六藝其所成就恐非後人所及至於左丘明以下經師二十餘人雖其中不無可議然當世衰道微火于秦黃老于漢佛于魏晉之時而此二十二人者守其遺經轉相付授講說注釋各竭其才以待後之學者則其為功殆亦猶文武成康之子孫雖衰替微弱無所振作尚能保守姬姓之宗祀譜牒以閱歷春秋戰國不亡而幸存者也雖有大過亦當宥之况小失乎今以因無可疵議與七十子二十二經師之有可疵議者較量彼此欲登因於從祀愚竊以為仲尼素

王也七十子助其創業者也二十二經師助其垂統者也遇其有過議而貸之猶得陪從也非是之比而徒曰我無過可以陪從未之前聞也建言者又謂與因同時若許衡吳澄其德學無以踰于因而亦得從祀因豈得以獨遺夫因之與衡澄其德業無大弗若也其功則有弗若也何也衡以其行道之功澄以其明道之功當元氏奮自朔漠統據函夏其君臣懣焉不知堯舜禹湯文武周公之道傳之孔子孔子傳之其徒以至於宋之周程張朱者其道足以撫世御極而衡首率誨誘之使知是道之可行至於澄所作諸

經纂言發揮洞達自朱子以後依經立說者鮮克儼之是以我朝太宗文皇帝命儒臣修輯五經四書性理大全於澄之說多所採入可謂能明是道者矣而因之說未有採者則是因既未若衡之道行於當時又未若澄之道明於後世其不從祀未必為闕典矣乃若薛學士瑄直躬慕古談道淑徒進無附庸退不慕戀勤學好問可謂文矣歸潔其身可謂清矣是以存蒙聖知歿賜美謚其為一代名臣夫何間然然論其於道所以與朱子諸徒相比並若黃榦輔廣之親承微言金履祥許謙之推衍緒說尚未知可

伯仲其間否也而遽言從祀竊恐世之君子將以建言者非愚則諛孰敢和附其說哉故愚以為瑄可無施行因宜准楊龜山例令其所在官司建祠奉祀庶足以伸敬先賢勸勵來學亦聖時崇儒重道之舉也議上故有是命

成化二年正月甲辰朔 己酉詹事府少詹事兼左春坊左諭德孔公恂以言事下獄出為漢陽知府公恂上言京師天下根本京師完固則四方安矣今四方多事內政不修將老兵弱何以應變北虜毛里孩數為邊患今復寇鴈門等關密邇京師其志叵測兵

部近又榜諭各處招募壯勇雖經御史論奏榜文尚在朝廷養兵百年未有小警輒欲募兵似有示弱之意萬一點虜窺我虛實擁衆南下不知誰可禦之者頃以荆襄之變命京營總兵撫寧伯朱永徂征夫荆襄之地流民依山據險猝難殄滅况其輕重視京師有間如永之威望今總兵中一人而已豈可使之久用於外宜留永鎮京師而別選人代之其提督軍務工部尚書白圭諳曉邊事嘗於陝西用兵有功亦宜轉以兵部之職假以便宜行事使與代永者分往荆襄守其要害斷其出入招徠撫綏遲以歲月彼烏合

之衆將不戰而自敗矣臣又見京師以南德州臨清東昌濟寧徐州正係朝廷喉襟要路除運糧操備之外守城不過疲卒二三百人間亦有空城者災傷之處小有阻滯糧道不通請於德州直抵徐揚及真保定等處起集民壯分屬軍政官訓練以備不虞更望皇上退朝之暇延見三五大臣講論治道審察事機務求萬全詔下其奏於所司於是兵科都給事中袁愷監察御史陳煇等交章劾之謂荆襄用人已有成命朱永雖望重三軍然虎臣布列豈無其比白圭既提督軍務則節制自專何必轉任民壯無異壯勇榜

文既收又欲起集何其言之自背矣也 上是科道

言命下公恂都察院獄當贖徒還職詔免徒調外任公恂為人直慇與衆不合初為給事中宣聖後且衍聖公孔弘緒大學士李賢壻也遂不次用為少詹事已有嫉之者及 上即位改大理少卿尋自奏復少詹事至是上疏請謂總兵中止有朱永一人於是諸總兵譁然不平言官聞風劾之 丁卯命太常少卿兼翰林院侍讀學士吳節署詹事府事 己巳上諭吏部臣曰今布按二司缺官數多令六部通政司大理寺三品以上堂上官各舉所知二三員不限

中外各具才行實迹并注堪任二司正佐移文吏部
仍會同內閣從公定與職事日後坐贓連坐舉主以
後仍照舊例推舉

二月癸酉朔 丁丑釋奠先師孔子遣少保吏部尚
書兼華蓋殿大學士李賢行禮 己卯命太常少卿
兼侍讀學士劉定之學士萬安為會試考官賜宴于
禮部 壬午太子太保吏部尚書王翱以年八十三
乞致仕上曰朝廷重用老臣不必固辭 癸未內閣
書辦禮部員外林章歷任年久陳情乞恩得陞為山
東布政司左叅議於順天府帶俸仍舊書辦 庚子

禮部尚書姚夔奏三月初一日殿試貢士合請讀卷
并執事官 上命少保吏部尚書兼華蓋殿大學士
李賢禮部尚書兼學士陳文兵部尚書兼學士彭時
太子太保吏部尚書王翱太子少保戶部尚書馬昂
兵部尚書王復刑部尚書陸瑜都察院左都御史李
秉通政司使張文質大理卿王槩太常少卿兼侍讀
學士吳節學士柯潛為讀卷官

三月壬寅朔 己酉少保吏部尚書兼華蓋殿大學
士李賢父封少保吏部尚書昇卒于家賢乞歸守制
有 旨方今用人之際李賢令馳驛奔喪葬畢速來

李賢存摺
復

且賜葬祭及齋糧麻布如例賢乞終制奏曰聖朝以孝治天下仕者官無大小於父母之喪皆終三年之制俾為子者得以盡其孝親之心臣叨居重職若徒盡為臣之事而不得盡為子之道恐得罪於名教乞允臣終制依例起復庶得忠孝少盡於萬一 詔曰朕賴卿輔導勿以私恩廢公議宜抑情遵命以成大孝不允終制 壬子大學士李賢再乞終制奏曰臣自出仕違父母膝下三十五年父今八十七歲而卒使臣又不得終三年之制抱此終天之痛死不瞑目矣今 皇上欲臣奔喪而不聽其終制豈非以國家

之事為重哉臣非不知所重但今內外大臣無非忠正老成之人去臣一人亦不為少况三年之間瞬息而過臣年僅五十有九未填溝壑驅策駑鈍以報稱萬一尚有日也奏入 詔曰卿當深念職任之重移孝為忠不必固辭 甲寅大學士李賢以朝廷遣官營其故父葬事奏原籍旱澇相仍恐勞民傷財乞暫停止 上不允命所司營之 乙卯授第一甲進士羅倫為修撰程敏政金簡為編修選進士林翰劉鈺章懋李傑翟瑛陸淵之黃仲昭謝文祥李瑋張誥畢瑜宋應奎邵有良商良臣鄭己張鈺章鎰何純莊景

陳贄卒

鍾晟王俊石淮施純王偉為庶吉士命學士劉定之
柯潛教習少保吏部尚書兼華蓋殿大學士李賢等
提督考校務令成效以需他日之用命有司給紙筆
饌飲燈燭第宅如例 己巳陞修撰黎淳為左春坊
左諭德以九年職滿也

閏三月壬申朔復廣東順德知縣錢溥為侍讀學士
致仕從溥乞恩也

四月辛丑朔 丙辰致仕太常少卿陳贄卒贄字惟
成浙江餘姚人舉經明行修為杭州府學訓導職滿
赴京適詔選人於內書館教內豎吏部試可擢待詔

九年陞典籍尋遷五經博士未踰年用學士高穀薦
陞廣東布政司左叅議景泰癸酉入為太常少卿天
順乙酉致仕至是卒年七十五訃聞遣官賜祭贄性
和易嗜書至老不倦尤好吟咏奉命教內豎人人得
其歡心故去任人恒思念之不忘子嘉猷別有傳

五月辛未朔 癸酉賜詹事府少詹事贈禮部左侍
郎劉鉉謚文恭 翰林院修撰羅倫言比聞朝廷援
楊溥故事起復大學士李賢者臣切以謂李賢大臣
起復大事綱常所關風化所係言雖若迂所關甚大
事雖若緩所係甚切惟陛下亮之夫為人子者未有

羅倫諫起復

不孝於親而能忠於君者也為人君者未有不教其臣以孝而得其臣之忠者也是故為君者當以先王之禮教其臣為臣者當據先王之禮事其君臣不暇遠舉請以宋言之仁宗嘗以故事起復富弼矣弼之詞曰何必遵故事以遂前代之非但當據古禮以行今日之是仁宗卒從其請孝宗嘗以故事起復劉珙矣珙之詞曰身在草土之中國無門庭之寇難冒金革之名以私利祿之實孝宗卒允其請是二君者可謂能教其臣以孝而二臣者可謂移其孝以忠於君者也臣願陛下以宋為鑒以禮處賢使其盡孝於

親而不得罪於名教此臣之願亦賢之分也夫陛下之任賢在信與不信而不在起與不起也賢身不可起賢口則可言宜降溫詔俾如劉珙不以一身之戚而忘天下之憂使賢於天下之事知之必言言之必盡陛下於賢之言聞之必行行之必力則賢雖不起復猶起復也使賢於天下之事知之而不言言之而有隱陛下於賢之言聞之而不行行之而不力則賢雖起復猶不起復也且婦於舅姑有三年喪孫於祖父母禮有暮服奪情於夫初無與其妻起復於父初無干其子今或舍館如故妻孥不動乃號於天下曰

本欲終喪朝廷不容雖三尺童子臣恐其不信也枉已者未有能直夫人忘親者未有能忠於君望其直人而先枉已望其忠君而先忘親陛下何取於斯人而起復之哉何不使之全孝於家而後移忠於國哉孔子曰上有好者下必有甚焉者矣陛下誠能守先王之通禮遵祖宗之成憲待以禮義而不縻之以爵祿激以廉耻而不誘之以名位使積習之弊脫然以除則忠孝之心油然而生特在乎陛下轉移之間何如耳天子者以孝治天下者也大臣者佐天子以孝治天下者也欲孝行於天下必先行之於大臣臣

願陛下不惑群議斷自聖衷取回使臣許令李賢依富弼故事守制以劉珙故事言事朝廷既正則天下自正大臣既行則群臣自效綱常由是而正人倫由是而明風俗由是而厚士心由是而純矣臣言一出見者必忤衆怒群猜將無不至惟陛下矜賜優容使讜言日進曲加保護使士氣日振則天下幸甚疏入不出翌日有旨羅倫狂妄粗疎難居近侍吏部其調除外任遂出為福建市舶司提舉副丙子大學士李賢奔喪回至京命復任視事賢奏曰臣本以凡庸誤蒙先帝擢用八年之間無所建明有乖清議

食陽沙錄 卷之五 十五
陛下即位之初念臣青宮隨侍年久隨例陞進臣雖
自揣非據不敢獨辭不幸遭父之喪禮當守制陛下
念朝廷事重不允終制不知臣實篤劣不勝茲任有
類折足之鼎將必覆公之餗矣况奪情非太平之美
事古之大臣若房玄齡張九齡寇準文天祥雖皆奪
情而人不之非議者良以其才足以勝重任而有益
於國家天下也如臣不過尋常之流而亦奪情寧免
人之非議乎非本心也伏望陛下矜而從之容臣守
制庶為太平美事 詔曰禮有經有權朕特從權用
卿累辭不允若固違君命豈得為孝卿當深念大義

勿恤微言勉起就任所辭不允其母再陳明日又奏
曰臣罪逆深重禍延臣父禮當守制 皇上以用人
之際不允終制臣彼時自念歸家葬畢遣人馳奏務
求終制不意 皇上特命內臣馳驛同行到家匆匆
喪事甫畢內臣即日催迫上道自計到京謝恩之後
披瀝肝膽必遂所請兩具疏陳情未蒙矜允用是再
竭愚衷上塵天聽臣惟親喪守制實萬世之常經大
臣奪情豈一時之令典况臣衰朽未必能副陛下之
盛意徒重臣之慚增臣之罪而已伏望 皇上早降
綸音許臣終制 詔曰卿言之再三朕已具知但委

託尤重宜體至懷即日就任慎勿再言

六月庚子朔 辛亥改學士倪謙于南京翰林院謙
自謫戍復職閑住至是詣闕謝恩特命于東閣辦事
言官劾其貪冒無耻乃以疾辭 上以謙子岳同在
翰林改南京 陛修撰陳鑑為侍讀以在東宮嘗侍
講讀也 乙丑禮部左侍郎李紹乞歸養病許之仍
諭以疾愈復來供職時紹纂修 英廟實錄充副總
裁書未脫藁 上曰其情辭懇切特聽其歸時其子
璠為庶吉士請假侍其行從之 戊辰陛學士倪謙
為禮部右侍郎

七月庚午朔 辛未命禮部右侍郎倪謙致仕六科
十三道共劾謙姦貪邪佞交結外藩本當置于極典
幸而得戍邊方復蒙 皇上寬恩復其舊職閑住自
合靖居閭里却乃不召而來希求進用玷污清班知
不容於公論偽乞致仕 皇上復徇所請俾官南京
又貳宗伯朝野驚駭衆論喧騰臣等官居耳目職任
激揚竊附呂誨之知人敢辭陽城之竄逐伏望將謙
革職放歸田里以為希進者之戒有旨倪謙有隨侍
舊勞特留任用今公論既不可仍令致仕 辛巳詹
事府少詹事兼國子監祭酒司馬恂卒恂字恂如系

出夏縣司馬氏今家紹興為山陰人由郡學生貢入
大學正統甲子魁順天府鄉試歲己巳擢刑科給事
中天順丁丑 上復儲位選任左春坊左贊善日侍
講讀癸未超遷少詹事仍侍講讀乙酉以登極恩命
兼國子監祭酒以父老乞假歸省還卒訃聞遣官諭
祭後追贈禮部左侍郎恂善記問兼通篆隸居官勤
慎嘗出使朝鮮及充會試同考官方在言路居講筵
敦厚謙讓人多稱之及擢副宮端遂有入閣之望情
態頓殊 上即位僅以舊職兼祭酒不滿所望或形
于言士大夫以此薄之孫公紳以恩例授中書舍人

八月庚子朔 丁未釋奠先師孔子遣太子太保兼
吏部尚書王翱行禮 擢進士馬誠梁翰為檢討教
官何壁周瑾為待詔監生羅麟孫迪為中書舍人侍
崇王讀書習字 壬子進士周鑑以避選王府官問
遣為民時崇王將出就學詔吏部選進士等官侍講
讀鑑在選中稱病覲免尚書王翱奏鑑懷奸不忠付
法司罪之遂除名 壬戌陞修撰邢讓為國子監祭
酒 丁卯命諭祭故少保兵部尚書于謙復其子冕
為府軍前衛副千戶時冕累奏其父謙歷事 列聖
頗效勤勞正統十四年多事之秋親督大軍奮身出

論祭故兵部
尚書于謙

戰守護京師敵退強虜安保國家之功天下共知止以平素奉公不阿致怨權奸被石亨等誣告以死伏望聖恩憫念量與祭祀以慰先臣之寃仍加優卹使臣得延喘息以奉先祀則存歿幸甚章上 上曰于謙有勞於國與衆不同翰林院其撰文遣行人往祭其文曰卿以俊偉之器經濟之才歷事先朝茂著勞績當國家之多難保社稷之無虞惟公道以自持為權姦之所害在 先帝已知其枉而朕心實憐其忠故復卿子官遣行人諭祭嗚呼哀其死而表其生一順乎天理厄於前而伸於後允愜乎人心用昭百

世之令名式慰九泉之冥漠靈爽如在尚克鑒之謙有功於國而死於非命人父為之寃憤至是少慰釋云

九月己巳朔 戊子太常少卿兼侍讀孫賢乞歸省許之給驛以行仍速其來

十月己亥朔 戊申賜故工部尚書兼東閣大學士高穀謚禮部尚書姚夔言穀清慎自持端亮有守始侍經筵繼入內閣恪持公論孜孜為國當先帝北巡力主迎鑾之議及駕南還獨建郊迎之策後遂乞歸田里進退有道始終不渝乞加封謚表勵臣節詔從

賜大學士高穀謚

少保大學士李賢卒

之賜謚曰文義

十二月戊戌朔 甲寅少保吏部尚書兼華蓋殿大學士李賢卒賢字原德河南鄧州人宣德癸丑進士初授驗封司主事歷考功文選郎中景泰辛未超擢兵部侍郎奉命四川考察官尋改戶部又改吏部英宗復位以張軌荐命兼學士入內閣叅與機務進尚書與武功伯徐有貞共事時御史楊瑄劾曹吉祥石亨不法事二人疑出有貞意入譖之遂併賢下獄是夜雷雨大作二人恐復請輕之乃降福建右叅政既而留為吏部左侍郎尋進尚書兼學士如故寵遇

益隆宣召顧問無虛日五年曹欽作亂傷賢臂脇令草請罪疏意欲害之賴吏部尚書王翱力救獲免欽伏誅賢亟上書請寬宥從者 英宗降勅曰卿力疾供事忠勤可嘉特加太子少保 上即位進少保吏部尚書華蓋殿大學士知經筵事加光祿大夫柱國成化二年丁父憂命奔喪還治事累上疏請終制不許遣中官輔行月餘復任至是得疾卒年五十九上震悼輟朝一日賜葬祭如例贈特進光祿大夫左柱國太師謚文達官其子璋為尚寶司丞賢博厚有度量誠心待物有事輒以詢諸人矢口出言不為城

府立朝三十餘年惟一出四川考察官進退臧否頗不協人望天順初徐有貞既去獨被眷顧時常召入文華殿有所咨詢然多柅於權奸不敢盡言後權奸敗機務悉委賢言無不從 英宗每視朝畢立寶座上左右顧左顧則呼賢右顧則呼門達賢至御前語良久方出正統以來大臣得君未有如賢者天順初石亨等以迎復為功恃功干政言多不遜賢密進言曰天位乃 陛下所固有景泰不起群臣自行表請復辟何以兵為萬一不成禍且不測况宮禁非用兵之地不懲之後將效尤以階禍於無窮 英宗大悟

而亨等恩寵自是漸衰天順末門達怙寵作威分遣官校於天下緝訪事情所至紛擾軍衛有司聞風戰慄需求賄賂動以萬計賢因百戶陳以節者擾害江西以為言 英宗以戒達達黨始少戢然啣賢刺骨百計撫賢罪將置之死地 英宗知之諧不行 上初嗣位每因事進諫頗切治理性喜讀書公暇手不釋卷好讀性理之書作為文章援筆立就不事雕琢陳文誌其墓謂賢量宏而福厚大臣遭遇之隆無與比者蓋實錄云 丙辰命太常少卿兼侍讀學士劉定之於內閣叅預機務定之辭 上以其練達老成

不許

成化三年二月丁酉朔 釋奠先師孔子遣太子少
保戶部尚書馬昂行禮 庚子陞修撰劉宣為右春
坊右諭德以九年秩滿 甲辰國子監祭酒邢讓等
奏國子監 祖宗以來欽降勅諭學規所以欽崇勸
勵之道罔不周備歷歲綿遠恐致遺失今本監原有
磨成石碑乞將學規募工鐫石樹立太學中門外使
師生人等永遠遵守從之 兵部尚書兼學士彭時
歸省還任 丙辰故工部尚書謹身殿大學士兼東
閣大學士高穀子垣叙其父勞乞恩錄用命送國子

監讀書

三月丙寅朔錄故少保吏部尚書華蓋殿大學士李
賢子璋為尚寶司丞 戊辰復商輅為兵部左侍郎
兼學士內閣叅預機務天順初輅為石亨所誣除名
屏居鄉里者十年至是復起用之輅具疏辭免 上
曰先帝已知卿枉朕今擢用卿可勉力效用不准辭
戊子禮部尚書兼學士陳文兵部尚書兼學士彭時
兵部左侍郎兼學士商輅太常少卿兼侍讀學士劉
定之言上天垂戒聖心憂勞勅諭群臣修省改過靜
言思之臣等之過尤重其玷累聖治尤多蓋自 祖

宗以來設置內閣之臣所以備論思典命勸勉聖
學與聞庶政以助成太平熙皞之化良有在也伏惟
陛下聖性高明可以比仁義于堯舜並勇知于湯武
而臣等才業問學殆不及後世之良弼無以贊助萬
一言乎備論思則不能知無不言言無不盡如魏徵
之犯顏敢諫俾其君致貞觀年中斗米三錢外戶不
閉行旅不齎糧之富足是以黎庶猶多貧困言乎典
命令則不能宣布 聖天子威德之烜赫睿思之精
微以鼓動四方如陸贄所造詔書使河北叛將讀之
歸命山東父老感泣是以夷狄猶或崛強言乎勸勉

聖學則經筵講讀不能如程頤之辭嚴義正范祖禹
之色溫氣和使聖聰之樂聞不厭是以日就月將之
功猶未至極至於與聞庶務則未嘗見賢必薦如崔
祐甫而用舍之際未合人心未嘗遇事必爭如張九
齡而處置之間未愜輿論是以四海九州之廣猶未
咸寧蓋有其君而無其臣所以不能致治而感動天
變也臣等不堪其任若此允宜罷黜或退就閑散或
放歸林泉然後皇上別簡賢能如古之諸臣者來居
內閣以裨益大猷庶幾天眷永保自無災異之來宸
慮少寬免臻宵旰之念 上曰卿等職居輔導朕方

倚託調燮何以遽乞退閑所辭不允 庚寅封兵部尚書兼學士彭時父毓義如其子官常制京朝官滿三年方賜誥勅時任尚書未三年以毓義年七十有九恐不能久待榮命具疏以請許之

四月丙申朔 丁酉陞編修江朝宗為侍講以九年任滿也

五月乙丑朔 壬申授國子監生呂憲為中書舍人憲故學士原之子以廕補也

六月甲子朔 戊申兵部左侍郎兼學士商輅上言勤聖政納諫諍儲將材飭邊備汰冗濫廣積蓄崇聖

道謹士習八事疏入

上嘉其言有理命所司詳者

覆奏 太常少卿兼侍讀學士劉定之請以陳皓從

祀孔廟 乙卯復福建市舶副提舉羅倫為修撰調

南京從商輅言也

七月甲子朔 丁丑陞編修楊守陳為侍講以九年

秩滿也 壬午太子太保吏部尚書王翱寢疾餘五

月乞退閑養病詞甚懇切 上曰卿歷事累朝為國

老成朕方倚任豈宜辭去但今病篤姑勉從所請時

翱年八十有四矣

八月甲午朔 丁酉釋奠先師孔子遣禮部尚書兼

英廟實錄成

翰林學士陳文行禮。戊戌改南京國子監祭酒劉俊為南通政司左通政俊質朴少文累被科道論列故特改任。庚子陞侍讀學士周洪謨為南京國子監祭酒。丁巳進。英宗皇帝實錄成是日賜監修官太保會昌侯孫繼宗總裁禮部尚書兼學士陳文兵部尚書兼學士彭時人白金八十兩文綺四表裏羅衣一襲鞍馬一副副總裁太常少卿兼侍讀學士劉定之吳節人白金八十兩文綺四表裏羅衣一襲纂修官學士柯潛萬安侍講學士李泰太常少卿兼侍讀孫賢劉珣左春坊左諭德黎淳右春坊右諭德

童緣劉宣侍講江朝宗楊守陳修撰王一夔彭教編修尹直徐瓊陳秉中李永通鄭環劉健汪諧張元禎吳鈺羅璟檢討耿裕周經纂修兼校正官侍讀劉吉陳鑑侍講丘濬編修彭華人白金三十兩文綺三表裏羅衣一襲纂修官吏部驗封司員外韓定中書舍人馬麟焦瑞李溥稽考叅對官編修李東陽倪岳謝鐸焦芳陳音程敏政檢討吳希賢人白金二十兩文綺二表裏羅衣一襲膳錄官太僕卿余謙等十四員人白金十五兩文綺二表裏羅衣一襲收掌文籍官冀舞等二員人白金十兩文綺一表裏膳錄譯字

官并監生胡清等二十二人人白金五兩文綺一表
裏其纂修侍讀學士周洪謨白金三十兩文綺三表
裏羅衣一襲修撰邢讓王猷人白金十兩文綺二表
裏纂修庶子王儉徐溥侍讀李本并謄錄中書舍人
劉珙署丞潘致中序班梁俊人白金十兩文綺一表
裏謄錄員外謝宇中書舍人溫良序班周景人白金
五兩文綺一表裏以洪謨等各陞擢憂制去任久近
不一故賜賚有差總裁侍郎李紹以致仕纂修修撰
岳正以事故皆不與賞 戊午以修 英廟實錄成
監修會昌侯孫繼宗加太傅總裁禮部尚書陳文兵

部尚書彭時俱加太子少保兼文淵閣大學士尚書
如故副總裁太常寺少卿兼侍讀學士劉定之陞工
部右侍郎兼學士太常少卿兼侍讀學士吳節陞太
常卿仍兼侍讀學士纂修學士柯潛萬安侍講學士
李泰俱陞詹事府少詹事仍各兼舊職太常少卿兼
侍讀孫賢劉翊陞太常卿俱兼職如故侍讀陳鑑劉
吉陞侍讀學士侍講丘濬陞侍講學士左春坊左諭
德黎淳陞右庶子左春坊右諭德童緣劉宣俱右庶
子修撰王一夔陞右諭德侍講江朝宗楊守陳俱司
經局洗馬編修彭華尹直俱侍讀修撰彭教編修徐

瓊陳秉中李永通俱侍講檢討耿裕編修鄭環劉健
汪諧吳鉞羅璟俱修撰檢討周經陞編修稽考叅對
編修李東陽倪岳謝鐸焦芳陳音程敏政檢討吳希
賢各陞俸一級催纂吏部員外韓定陞郎中中書舍
人馬麟焦瑀李溥陞俸一級騰錄太僕卿余謙陞太
常卿山東布政司左叅議林璋陞太常少卿禮部郎
中吳謙加從四品散官并俸員外何暹葉玫陳綱吏
部員外王瓊俱郎中中書舍人凌暉蔚瑄黃清劉詢
俱陞俸一級其餘進秩出身有差 庚申命太學生
高垣入翰林習字出身垣既以其父毅恩例乞入太

學至是又援例上請故有是命

九月癸亥朔陞禮部左侍郎鄒幹為南京禮部尚書
戊辰召巡撫宣府左僉都御史葉盛為禮部右侍郎
盛言竊見故永寧伯譚廣逮事 太宗皇帝在漠北
所統部曲時號譚家馬 仁宗皇帝命守宣府二十
餘年兒童婦女皆知其賢功在朝廷澤存邊圉其身
僅有爵位其子不得嚴封臣又因廣而有所感焉姑
以耳目所及舉其一二如鎮守廣西都督山雲浙江
都督許亨寧夏都督張泰等皆有賢名又如文臣中
尚書都御史卿佐等官純誠朴忠如王直胡濙高穀

清德正學如薛瑄儀智陳璉吳溥楊翥吳訥風節凝
峻如錢習禮李時勉庶恭體國如師達古朴顧佐王
質魯穆李棠楊信民軒輓于王公勳才望如金忠張
本魏源張駿羅汝敬劉忠敷鄺埜王佐王忞侯璉徐
琦王士嘉段民焦宏金問薩琦王恂張鳳沈翼年富
賈銓監學規矩如胡儼陳敬宗他如魏驥陳泰李敏
馬謹亦有可稱又有歿于王事尤足矜念如都御史
等官鄧祭等者洪惟我朝有道之長百年于茲矣仁
賢輩出中外大小皆有其人臣寡昧不能悉知亦未
暇悉言而涉嫌者又不敢指言乞特命儒臣翻閱累

朝紀載或斷自宸衷定立期程大集廷臣溥求公議
論其能行之大小勞績之淺深歷年之久近取衆所
共知名實昭著之尤如譚廣王直者武臣或贈謚或
別錄子孫一人文臣或贈謚或廢叙錄其子孫一人
入監或俱令自陳取自聖裁將見漢晉之論功至及
蕭何羊祜之妻唐太宗特官屈突通張道源之子不
得專美于前而百官臣庶觀感激發為勸多矣 上
善之下廷議吏部請下有司諭故諸大臣子孫各疏
其祖若父官資并行績以聞詔從其議 丙子丁憂
修撰王獻乞終制許之時獻聞喪還鄉守制有陰厚

之者請于朝乞起復獻內書館教書獻不自安故也
已卯改進士余贊為庶吉士譯字如舊左春坊左
庶子黎淳等奏臣等伏覩祖宗實錄并御製五倫
書洪武初置東宮僚俱命廷臣李善長劉基等兼領
未嘗別設其後禮部尚書陶凱請選人專任罷兼領
之職太祖高皇帝曰朕今以廷臣有才望勲德者
兼東宮官非無謂也蓋慮廷臣與東宮官有不相能
遂成嫌隙其禍非細朕今立法無職父子一道君臣
一心庶無相構之患太宗文皇帝曰皇考之制
東宮官率以廷臣兼之蓋任使專一則嫌隙不生

仁孝文皇后曰此先朝鑒戒徃古之失誠良法也
雖萬世當守之而行自是列聖相承允東宮官僚
自師保而下俱命勲戚及翰林院儒臣兼之未嘗專
設近者臣等先任翰林院侍講修撰等官九年秩滿
及纂修實錄進呈蒙聖上陞庶子諭德洗馬臣等
仰荷隆恩有如天地雖竭力捐軀尚恐有玷清職豈
敢妄有所冀但念祖宗東宮官僚俱係兼職今臣
等獨專職任非惟素餐可耻抑於舊制似有未合伏
望皇上斷自宸衷命臣等仍兼翰林之職庶上
合祖宗之制下免素餐之譏疏入詔不許丙申

特賜工部右侍郎兼學士劉定之太常卿兼侍讀學士吳節誥命定之等奏言久竊祿位不能顯揚其親所望考滿幸給誥命然退自念臣定之近六十歲有母將八十歲臣節已七十歲有母過九十歲以垂白之子守垂白之母旦夕難期深為可慮伏望 聖恩及今頒賜俾其歿逝父祖得蒙澤于漏泉老耄母親獲延光于暮日戴天地之大德遂犬馬之私願上令即給之 戊申擢庶吉士宋應奎李傑章懋黃仲昭商良臣為編修莊昶為檢討劉鈺等十五人送吏部除授在京科道部屬鈺與陸淵之畢瑜鍾晟王俊石

淮俱主事翟英張鎰施純俱給事中謝文祥李瑛張誥邵有良鄭已何純俱監察御史

十二月癸巳朔 庚子禮部等衙門會議訓導高瑤所奏追加景泰廟號僉謂郕王繼位六七年間行事俱在實錄其廟號非臣下所敢輕議請自 上裁左

春坊左庶子黎淳等奏曰正統十四年八月冊立

陛下為皇太子至九月群臣又奉郕王即帝位改元景泰緣 陛下為皇太子在前郕王即位在前後事有礙至天順元年 英宗復位欽遵 慈壽皇太后聖旨仍復景泰為郕王誥天下永為遵守然後人倫正

天理得名正言順而事成矣高瑤建言乃欲加郟王廟號臣惟立皇太子則異時居天子之位曾未半月又立一親王為天子則前時所立皇太子將何為哉此景泰三年皇太子之廢有由然也然周成王之時旦姬實有功之叔父何不遂取天位雖曰神器久虛不可無人然共和之際周召皆王國之懿親何不共分姬室特以君臣有定分而不敢耳允若此者皇太子為君親王為臣天經地義民彝物則截然一定固不待智者而後知之今多官會議依違苟簡畧無定見猶欲煩瀆聖聰取自上裁豈臣愚之所能喻哉

先帝明並日月此事處置已久人心已定今若誤聽高瑤之言一加郟王廟號必將祭告太廟改易舊制而行祔廟承祧之禮馬必將遷啓梓宮改造山陵而加珠襦玉匣之典馬必將追贈皇太后皇后之稱馬必當盡復當時所用之人所行之政馬且高瑤此言有死罪二一誣先帝為不明一陷陛下於不孝古之聖賢經史具在魯隱公內不承國於先君上不稟命於天子諸大夫拔已以立而遂立馬是與爭亂造端故春秋首書元年春王正月而削公即位正大倫也郟王之即位內承國於何君上稟命於何主不

過群臣板已以立而遂立爾律之隱公先合無二為人君父而不通春秋之義必蒙首惡之名是故昌邑既廢未聞復為漢某帝更始既廢未聞復為漢某王誠不敢悖逆春秋移不明之過加於先君而欲全孝道於子孫也陛下昔為皇太子名正言順誰得私議邨王乃敢廢之易以己子至使先帝久遭幽閉此非邨王所自為也當時館閣大臣陳循等貪圖富貴密運奸謀從吏為之也至於天順元年邨王有疾陳循等自合迎請先帝復位却乃率領群臣進本奏乞早選元良正位東宮當時皇太子見在欲選何

人以臣愚見若非南城迎駕之功先帝終無出路矣但此迎駕之人又皆貪圖富貴之小人既效微勞氣盈志滿驕奢淫泆靡所不為是故高爵厚祿封公封侯所以尊顯於元年者賞其迎駕之功也嚴刑峻法或斬或流所以誅戮於後來者罰其驕矜之罪也今流言國中必曰先帝怒此諸人迎駕而罪之則萬無此理而不足信矣陛下即位之初有罪群邪寒心破膽及見取回商輅仍舊復職內閣辦事然後欣然自以為得計又皆私竊效慕希求進用矣彼小人者但欲得官於己豈顧貽患於人臣以為高瑄此舉

章懋黃仲昭
晁棗張燈

非欲尊禮邸王也特為群邪進用之階也必有小人
主使之者不然彼草茅踈遠安敢妄言上誣先帝
之明使後世觀之以為口實而今之議者亦豈可不
察乎此隱忍曲從而猶欲煩陛下之聽批䟽入上
曰景泰已往過失朕不介意豈臣下所當言顯是獻
諂希恩俱不必行辛丑調編修章懋為湖廣臨武
知縣黃仲昭湘潭縣知縣檢討莊景桂陽州判官時
以明年上元張灯命翰林院詞臣撰詩詞懋等上䟽
以為陛下張燈之舉或者兩宮皇太后上欲極孝養
奉其歡心然大孝在乎養志臣等伏覩兩宮母后恭

儉慈仁之德著于天下坤儀貞靜豈以張燈為樂哉
况今兩廣弗靖四川未寧遼東賊情難測北虜猶當
深慮江西湖廣亢旱數千里民不聊生雖蒙優詔賑
恤而公私匱乏計無所出可謂寒心此正宵旰焦勞
不遑暇食之時兩宮母后同憂天下之日至如翰林
官以論思代言為職雖曰供奉文字然鄙俚不經之
詞豈宜進于君上固不可曲引宋祁蘇軾之教坊致
語以自取侮慢不經之罪臣等又嘗伏讀宣宗章
皇帝御製翰林院箴有曰啓沃之言惟義與仁堯舜
之道鄒孟以陳今張燈之舉恐非堯舜之道應制之

詩恐非仁義之言臣等知陛下之心即祖宗之心故不敢以是妄陳于上且知其不可猶順而為之是不忠也知不可為而不以實聞是不直也不忠不直臣罪大矣伏願採蕩蕩之言於此等事一切禁止疏入上曰元宵張燈儒臣應制撰詩歷代有之祖宗以來不廢此典朕今視舊減省止存其槩以奉兩宮聖母豈致妨政害民懋等不通典故妄言譏議難居文翰之職命杖之調外任 壬寅錄故少保禮部尚書兼武英殿大學士楊溥孫泰為中書舍人 丁未禮部左侍郎兼學士致仕許彬卒彬字道中山東寧陽人以舉人選入翰林院譯字中永樂乙未進士改翰林院庶吉士歷任檢討編修撰正統丁卯禮部因福建奏請鄉試考官奏命彬往明年丁父憂奪情起復歲己巳之變陞大理少卿尋以四夷館譯書之人提督轉太常少卿兼侍詔提督譯書景泰初英宗自虜地將還奉使迎駕歸陞本寺卿英宗復位彬以嘗迎駕且素與石亨善得入內閣進禮部左侍郎兼學士亨初與徐有貞同事既而交惡因擠之而波及於彬調南京禮部既行降陝西叅政至則乞致仕許之成化初命復其官仍致仕至是卒年七十六彬性坦

率無拘檢廣交游而不擇人一時放蕩之士多出其門吟詩飲酒以為樂議論壹壹而不切於用晚預機務方欲閉門謝客而平昔舊游惡其變態率多騰謗云 甲寅以河南左布政使揚璿為戶部右侍郎詹事府少詹事兼學士萬安為禮部左侍郎河南布政使曾翬為刑部左侍郎山東左布政使彭誼為工部左侍郎

陳文舉

成化四年四月庚寅朔 丁巳太子少保禮部尚書兼文淵閣大學士陳文舉卒文字安簡江西廬陵人正統丙辰進士及第授編修充經筵官己巳陞侍講景

泰庚午考順天鄉試是科廣舉子解額得人為多辛未用少保高穀薦擢雲南右布政使政尚寬平民以為便天順丁丑遷廣東左布政使以母喪不果赴戊寅驛召還京師拜詹事府詹事癸未擢禮部右侍郎兼學士入內閣參預機務 甲申 上嗣位改吏部左侍郎兼職如故同知經筵事修 英宗實錄充總裁官乙酉陞禮部尚書丁亥實錄成加太子少保兼文淵閣大學士尚書如故至是卒贈榮祿大夫少傅謚曰莊靖遣官祭葬官其子璋為中書舍人文體貌魁梧丰采峻整早負重望其在雲南士大夫冀其必

進用及掌宮端乃好行鄙事為春坊官憑勢者所侮慢恒歛容遜避人頗致疑逮晚遭柄用與李賢同事事皆處分於賢輒懷憤撓之賢卒首秉國鈞遂恣意徑行不顧大體尤不能誨子縱其僕隸大通賄賂名望大損人皆嘆其不如素料云

五月庚申朔 癸亥禮部主事陸淵之奏大學士陳文平生所存所行貪德彰聞汚風大著縱子為惡滅裂義方謬居調元贊化之任素乏經邦濟世之才不當與莊靖美謚 上曰陳文在時不聞人言其過惡沒後循例加以恩典事已施行如何方來奏訐不准

丁卯工部右侍郎兼學士劉定之以久早上言四事一曰求天地之心二曰體祖宗之意三曰聖學宜法乎切近四曰聖治勿惑乎異端疏入留中不出 丁丑兵部左侍郎兼學士商輅乞致仕 上批荅曰朕知卿往年以非罪罷官特加簡用今何嫌疑輒求退休宜勉副倚毗所辭不允 壬午改翰林院侍講陳秉中為南京翰林院侍講署院事

六月己丑朔 辛亥故大學士陳文子琛奏主事陸淵之御史謝文祥嘗為庶吉士欲求留翰林院臣父薄其為人且無志讀書屢試輒在人後不允因此懷

恨肆言詆誣臣父乞加黜罰以懲言者事下刑部刑部具三章通覆奏上曰陸淵之謝文祥乃庶吉士退出中間必有挾私情由但其事既已處分不必問七月戊午朔己巳命侍讀學士陳鑑侍讀尹直為應天鄉試考試官

八月戊子朔甲午命少詹事兼侍講學士李泰侍讀彭華為順天府考試官

九月丁巳朔丙寅太子少保兵部尚書兼文淵閣大學士彭時等言比年以來地震水旱相仍民不聊生邇者彗星復見災異尤甚皆臣下不職所致乞賜

罷免上曰上天垂戒朕自修省卿等皆職居輔導當講求缺失修舉善政加惠軍民庶可以回天意豈可捨朕而去所辭不允庚子監察御史胡深等六人因天出彗星言如兵部左侍郎兼學士商輅乃先帝親擢恩幸無比當皇上正位青宮邸邸密議廢立彼以內閣大臣畧無一言救正方且自圖富貴徇其邪議是乃賣國之奸實皇上之罪人也兵部尚書兼大理卿程信頃承朝命督師西川聽囑權豪之子弟多分首級以報功禮部尚書姚夔用私滅公貪財黷貨比因度僧受贓鉅萬故京師有反賊劉千

斤賊官姚萬兩之謹太子少保戶部尚書馬昂不學無術妨政害民納餽送之女結勢要之人四方水旱賑救無方三邊軍餉調度無策凡此數人皆足致變上天垂戒職此之由乞賜罷黜以答天意疏入上曰如今人才難得取其所長皆有可用况急切用人之際豈可求備所言不允翌日早朝兵科給事中董旻等三人亦具疏於御前面進上曰朝廷進退大臣自有禮體旻等不循舊規紊亂朝儀本當治罪姑宥之前此奏劾之疏非宣讀於廷則封進於內未有不讀而面進者故 聖諭云然 癸酉兵部左侍郎

商輅懇乞休致 上曰朕用卿不疑何恤人言其勿再辭 己卯兵部左侍郎兼學士商輅言比臣以疾在告忽奉宣喚諭臣入內閣供職臣即附奏再乞調理乞特賜放歸 上曰朝廷修舉政務自有次第卿宜速出效用不可故違甲申命會官廷鞠給事中董旻等三人監察御史胡深等六人先是旻等以彗星見各上疏請罷兵部左侍郎兼學士商輅禮部尚書姚夔兵部尚書兼大理卿程信 上皆留之輅等不自安各上章求退夔奏多詆言者於是旻等復言輅等求退之章皆有欲進之意飾非強辨決當罷黜而

攻夔尤切謂先王之世采民謠以觀政而夔以為匿
名之書有禁 祖宗之制許言官風聞言事而夔以
為流言之謗必誅其欺天罔人肆無忌憚如此蓋欲
激發朝廷之怒以箝言官之口其奸惡蓋可見矣乞
早罷之 上震怒謂祖宗憲綱凡糾舉官員生殺與
奪悉聽上命若命既下不許再劾今乃故違有何主
意令錦衣衛三法司執曼等同多官廷鞠之監察御
史林誠又言近劾商輅當邸邸廢儲之際不能正救
今復起用不合人心蒙 聖諭以輅自居內閣累有
諍言非外人所知朕以此任用不疑言者不得其實

置之臣思言既失實宜加罪譴幸蒙曲宥不勝感激
但病勢日臻自揣難居言職乞放歸田里 上曰唐
太宗用王珪魏徵朕用商輅有何不可而屢奏擾亦
命廷鞠之

十月丁亥朔 辛亥少詹事兼學士柯潛奏比以災
異勅吏部都察院會同各衙門掌印官公同考察所
屬官員本院屬官俱以文翰為職侍讀等官彭華等
見在經筵講讀及纂修實錄其帶俸郎中等官吳謙
等并四夷館譯字官俱在內閣書寫誥勅翻譯外夷
文字無事蹟文案可考乞如天順八年考察官員事

例止令本院學士公同內閣學士考察詔從之於是
華等一百二十六員俱照舊任事四夷館帶俸二人
以素行不謹冠帶閑住時尚寶司左右春坊及六科
給事中亦援此考察取 旨詔皆留任事云 癸丑
勅陞兵部左侍郎兼學士商輅為兵部尚書工部右
侍郎兼學士劉定之為禮部左侍郎俱兼職如故仍
舊辦事輅定之俱上奏辭免 上皆不允且曰卿等
輔導有勞特茲陞用何以辭為 給致仕禮部右侍
郎倪謙誥命從其子編修岳之請也吏部言其曾犯
贓不當與 上曰謙以陞任致仕因子推恩亦何不

可其與之不為例

十一月丁巳朔 丙戌陞修撰王猷為左春坊左諭
德仍兼修撰以九年秩滿也

十二月丁亥朔 戊子少詹事兼學士柯潛聞父喪
守制且乞葬祭 上念潛久侍經筵命特與之不為
例 丁酉授庶吉士傅瀚為檢討

成化五年二月丙戌朔 壬辰命太常卿兼侍讀學
士劉珣侍讀學士劉吉為會試考試官 乙巳左春
坊左庶子兼翰林院侍講徐溥乞還鄉省親許之
閏二月丙辰朔 戊午編修焦芳謝鐸乞還鄉省祭

許之 已巳興化府知府岳正乞致仕正字季方順
天溲縣人家世武職至正折節讀書進士及第授編
修陞春坊右贊善改修撰 英宗復辟吏部尚書王
翱薦其可用召見命入內閣叅預機務正辭不許因
感激盡言不量可否然多泄于外時曹吉祥石亨怙
寵作威福熱熾熏天正極言不可不早圖且請自往
間二人以計去之二人聞而憾之適承天門災下詔
正視草有自責語二人遂指摘以為謗訕貶欽州同
知正母老不忍別留滯旬日始就道被先所與爭田
怨家囑行事者發其事復逮繫錦衣衛獄備拷掠謫

岳正卒

成鎮夷吉祥等敗始釋為民 上即位用御史言復
還修撰充經筵講官入纂修史館兵部舉正陞職清
理武職膳黃當國者惡之內批出正興化府至是來
朝覲乞致仕家居五年卒正豪雋負氣博學多才識
為文善煨煉嚴整有法慨然欲樹功業于時守興化
府多所興作莆之士大夫多謗之始正遭際僅踰月
每與人言恒自誇詡若柄用數歲者及顛躓不偶識
者謂浚恒起凶云

三月乙酉朔 乙未命太子少保吏部尚書兼文淵
閣大學士彭時吏部尚書崔恭戶部尚書楊鼎太子

少保兼兵部尚書白圭兵部尚書兼學士商輅刑部尚書陸瑜工部尚書王復都察院右都御史林聰項忠禮部左侍郎兼學士劉定之通政使司左通政楊遂大理寺左少卿喬毅侍講學士丘濬為殿試讀卷官 戊申授第一甲進士張昇為修撰丁溥董樾為編修 辛亥選進士張璠費閏陳斌蕭瑒梁澤尹龍馮蘭喬維翰陳紀張晟李介王臣尹仁王錦徐謙方珪謝顯吳祚改庶吉士進學于翰林命侍讀學士陳鑑侍講學士丘濬教習文章大學士彭時等提督考校務令成效以需他日之用命所司給紙筆飲饌燈

燭等物如舊例

改祭酒李時勉

四月甲寅朔 庚申贈國子監祭酒李時勉為禮部左侍郎改謚忠文賜誥命時勉先謚文毅至是其孫顥奏時勉歷官四朝曾效微勞請如吏部侍郎曹鼐之例改謚加贈 上曰時勉在 先朝直言敢諫於忠無忝矣毅不足以盡之其謚曰忠文加贈如例 五月甲申朔 辛卯陞吏部右侍郎尹旻為本部左侍郎改禮部侍郎葉盛於吏部陞都察院右副都御史原傑為戶部左侍郎陳宜為兵部右侍郎侍讀學士劉吉為禮部右侍郎仍侍經筵左布政使翁世資

秦敬為右副都御史食從二品俸世資巡撫山東敬
貴州 復漢陽府知府孔公恂為南京少詹事先是
公恂為少詹事言事為科道所劾下獄調知漢陽府
尋以父憂去在後學士商輅建議自元年以來凡以
言降調者皆復其職吏部舉奏公恂亦係因言降官
之數至是公恂起復至京復其官 壬辰禮部左侍
郎兼翰林院學士劉定之以久病陳乞致仕 上不
允 辛丑命禮部左侍郎萬安兼翰林院學士入內
閣叅預機務 賜故太子太保吏部尚書兼謹身殿
大學士王文祭時文之子戶部主事宗彞奏比于謙

事體相同也

六月癸丑朔 丙辰編修陸鈇奏乞還原籍養病許
之 庚申以禮部尚書姚夔為吏部尚書夔辭 上
曰卿才識老成特茲簡任宜勉修職業副朕至意所
辭不允 召南京禮部尚書鄒幹至京陞國子監祭
酒邢讓為禮部左侍郎侍讀學士陳鑑為祭酒
八月壬子朔 癸丑修撰鄭環乞歸省許之 翰林
院侍講學士丘濬以母喪去任濬奏臣幼喪父母李
氏守制不嫁以教育臣已蒙朝廷旌表復以臣任職
推恩封太孺人今在家病故乞賜諭祭從之不為例

侍郎劉定之卒

辛酉禮部左侍郎兼學士劉定之卒定之字主靜江西永豐人正統丙辰會試第一廷試進士及第授編修秩滿陞侍講景泰壬申陞司經局洗馬丙子進右春坊右庶子天順紀元改通政司右叅議俱兼侍講是冬改學士甲申進太常少卿兼翰林院侍講學士充國史副總裁成化丙戌冬入內閣叅與機務明年秋陞工部右侍郎兼學士又明年陞禮部左侍郎仍兼學士以疾乞致仕不允卒年六十一贈資善大夫禮部尚書謚文安賜塋祭給驛舟還其喪定之少穎敏絕人日記數千言父髦嘗領鄉荐不求仕家居授

徒博通古今知定之為偉器俾之博考群書而禁其作文一日見其所私作驚曰此子有八面受敵之才既而果以文章取高第名聞天下為人坦夷言動質直不事矯飾已巳之變上書陳十事皆切當時之務總裁國史發凡舉例刪繁撮要其功居多入內閣不久然一時制作多出其手為文援筆立就未嘗屬稿而偉思環情形生境具自出一家機軸論者謂國初以來能文之士博洽如定之者殆不數人但頗泥古施之於事或不通云 庚辰編修商良臣乞歸展祭許之

九月辛巳朔 壬午南京修撰羅倫以疾去任倫字
應魁江西永豐人少清苦力學成化丙戌舉進士第
一授修撰甫三閱月適大學士李賢聞父喪力求終
制 上不允命奔喪復任倫首上疏劾之反覆數千
言然頗不近人情俄有指羅倫粗率難居近侍調外
任乃除泉州市舶提舉既而言者多言宜召倫復其
官歲戊子因大學士商輅言改南京翰林修撰逾年
解官歸學者多從之游邑有山名金牛在萬山中非
人所居倫與從學者築室讀書其中至未數日中嵐
氣而卒倫性戇直不甚曉世務與人言竭盡底裏無

羅倫卒

察言觀色之慮臨事任意自是堅不可回家居行鄉
約時或致人于死有訟于官者適倫卒而止倫為文
率意而成動以古人為說然亦無所根據為人雖迂
僻然亦無他腸其視飾虛偽以盜名假恬退以營私
者則有間

成化六年三月庚辰朔 丁未陞右春坊右庶子劉
宣為南京太常少卿

六月戊申朔 甲子 上以會舉官多有未當諭吏
部臣曰今方面多缺員爾等務選任得人每缺推舉
兩員來聞不必會官保舉著為令 丁卯賜詹事府

少詹事兼學士柯潛母宜人戴氏祭戴氏受五品封
例不該祭時潛喪父守制家居復遇母喪具本乞恩
故有是命

七月丁丑朔 己卯今 上皇帝生 上之第三子
也母曰紀氏 十月乙巳朔 辛未太常卿兼翰林
侍讀學士吳節致仕

十二月甲辰朔 丁未翰林院侍講徐瓊服闋復任
癸丑復少保戶部尚書兼華蓋殿大學士陳循職時
循已卒其子珊奏被石亨誣害充軍已蒙 英宗聖
恩釋放為民家居而卒乞如于謙等例追復原職并

賜諭祭禮部復奏許之 癸亥賜禮部右侍郎劉吉
誥命先是言自陳父輔年七十九祖父母及母俱已
沒父自受編修封久未獲加恩典况臣父老病日侵
朝不保暮人子至情實為迫切乞照學士劉珣未及
三年請誥事例均施洪恩 詔特賜之時珣吉俱兼
經筵日講故恩禮特異云

館閣漫錄卷之六 起成化七年止成化二十三年

不二齋校梓

禮部侍郎李紹卒

成化七年正月甲戌朔 癸巳太常卿兼侍讀學士
劉翊以母喪去任 辛丑致仕禮部右侍郎李紹卒
紹字克述江西安福人宣德癸丑進士選庶吉士正
統初授檢討與修宣廟實錄既而以剩員汰歸未幾
景泰帝即位召克經筵官陞修撰歷司經局洗馬兼
修撰右春坊右庶子兼侍講天順初改尚寶司卿仍
兼侍講轉學士尋陞禮部右侍郎時有結權貴相軋
者以紹奏事多南音沮之 英宗不聽且曰禮部不

可無此人癸未會試紹專知貢舉防範甚嚴修英
廟實錄充付總裁書垂成以疾力求解任歸其後國
子祭酒為其屬所構吏部尚書姚夔言欲隆師道非
宿德重望不可援洪武初起致仕尚書劉崧署司業
故事虛祭酒位馳勅召之命至紹已卒紹體貌修偉
性剛直有器局刻志問學持論平正正統中 英宗
嘗訪人材少師楊士奇疏五人以對紹居其一後居
高位好獎勵後進聞人有善輒稱譽之為文有法度
不尚竒詭好古博雅積書甚富凡所有者無不究覽
焉紹卒時六十有五訃聞賜祭葬子瑢今為雲南布

政司使

二月甲辰朔 戊申南京國子監祭酒周洪謨以母
喪去任

三月甲戌朔禮部左侍郎邢讓國子監祭酒陳鑑司
業張業俱坐罪除名為椒油鈔錢助教葉時訐累也
戊戌修撰耿裕為國子監司業 庚子太常卿兼侍
讀孫賢陞兼侍讀學士詹事府少詹事兼侍講學士
李泰陞詹事兼職如故

五月癸酉朔 壬辰太子少保吏部尚書兼文淵閣
大學士彭時以疾乞致仕 上諭之曰卿年力未衰

正宜盡心輔朕未可言去暫免朝參每日進內閣供職所辭不允 乙未召學士柯潛于家先是國子監祭酒缺員吏部以養病侍郎李紹南京祭酒王僎名上 上命再推二員復以洗馬楊守陳江朝宗並上 上命召紹未至而卒至是又命吏部推舉乃以侍讀彭華尹直名上內批即行文召潛時潛守制家居也 巳亥禮部言嚴封衍聖公孔弘泰奉命在國子監讀書習禮一年今以屆期乞遣歸奉祭命仍留之

六月壬寅朔 巳酉翰林修撰彭教服闋復任 乙丑太常卿兼侍讀學士孫賢致仕賢以 皇儲未立

上章請立 皇太子并上章陳情乞休致詔聽其致仕而建儲之章留中不出蓋賢嘗侍 上於春宮講讀至是以國本大計欲有其功而又恐人議已并乞致仕非其情也

七月壬申朔 辛巳命司經局洗馬楊守陳侍講徐瓊為應天府鄉試考試官

八月辛丑朔 丙午命左春坊左諭德兼修撰王獻侍讀尹直為順天府考試官 丁未釋奠先師孔子遣學士商輅行禮 左春坊左庶子兼侍講徐溥聞父喪去任 上以溥侍講讀年深特賜其父琳以祭

不為例 庚甲編修李傑乞歸省親許之

閏九月庚子朔 戊午戶部尚書楊鼎奏先任編修侍郎親母繼母俱已蒙恩賜贈獨前母未蒙恩典謹援學士曹鼐例以請詔持許之不為例

十一月己亥朔 甲辰詹事府少詹事兼學士柯潛自其家具奏辭免召命乞終制許之

十二月戊辰朔 癸未太子少保吏部尚書兼文淵閣大學士彭時等言茲者天象垂戒古今罕見外人不知 皇上憂勤在心竊謂遇此災變視如泛常未嘗降顏一接臣下詢訪民情議論洵洵臣等欲在明

早朝退請便殿請見一以寬聖心一以息群議明日
上退朝御文華殿召時等見 庚寅左春坊左諭德
王一夔因彗星之變疏五事一曰正宮闕以端治本
二曰親大臣以詢治道三曰開言路以決壅塞四曰
慎刑獄以廣好生五曰謹妄費以足財用 上批荅
曰此皆陳腐之言而妄自張大本當究治但係用言
之時姑宥之 辛卯授庶吉士費閻尹龍喬維翰王
臣為編修張泰為檢討張璠陳珣梁澤陳紀李介徐
謙為監察御史

成化八年二月戊辰朔 癸酉命禮部左侍郎兼學

士萬安司經局洗馬江朝宗為會試考試官 甲戌
編修李東陽乞歸展墓許之

三月丁酉朔 丁未命太子少保吏部尚書兼文淵
閣大學士彭時兵部尚書兼學士商輅太子少保兼
吏部尚書姚夔戶部尚書楊鼎太子少保兼兵部尚
書白圭工部尚書王復都察院左都御史李賓禮部
左侍郎兼學士萬安刑部左侍郎曾暈掌通政司事
兵部左侍郎文質大理卿王傑左春坊左諭德王獻
為殿試讀卷官 庚申授第一甲進士吳寬為修撰
劉震李仁傑為編修 壬戌授庶吉士林瀚為編修

四月丁卯朔 癸未命少詹事兼侍講學士李泰復
任泰以司禮監太監永昌為父故不為所生母終喪
而止乞假襄葬事至是去三月餘還朝時論少之
五月丁酉朔 癸卯左春坊左諭德王一夔乞改姓
謝氏從之 丁未右春坊右庶子童緣服闋復任
戊申翰林修撰陸欽疾愈復任

六月丙寅朔 乙亥授庶吉士張晟為禮科給事中
王錦方珪謝顛為監察御史

七月丙申朔 辛丑修撰張昇乞歸省親許之 甲
辰改檢討李昊為南京禮科給事中昊以忻王官屬

至是薨故改任之 辛酉太子少保吏部尚書兼文淵閣大學士彭時稱病乞致仕言甚剴切 上曰覽奏備悉恫誠卿宜益加勉勵以副朕懷所辭不允 八月乙丑朔 甲申編修董樾乞歸省祭許之 九月甲午朔 甲寅陞禮部右侍郎劉吉為左侍郎 太常少卿俞欽為右侍郎

十一月癸巳朔 己酉詹事府詹事兼侍讀學士李泰卒泰字文通順天府香河人 正統戊辰進士改庶吉士授編修景泰間進左春坊左司直郎兼編修再陞右春坊右中允 英宗復辟改尚寶司丞兼編修

既而以侍東宮講讀陞侍講 上即位陞侍講學士兼經筵官尋侍文華日講修 英廟實錄成陞詹事府少詹事兼侍講學士未幾進詹事兼職如故至是卒年四十三贈禮部左侍郎賜祭葬泰繼伯父太監永昌在正統中掌章奏泰初應鄉試京尹進錄 英宗問左右李泰中否見其名甚喜及官翰林頗向學矜已自足不事華侈但生長富貴性狷僻與人寡合而所與者則相朋比汲引士論以是薄之

成化九年二月壬戌朔 壬申侍讀江朝宗以母喪去任 四月辛酉朔 甲申賜侍講學士江朝宗故母邢氏

祭從其請也

五月辛卯朔編修李仁傑省親復任 辛亥勅陞兵部尚書商輅為戶部尚書禮部左侍郎萬安為本部尚書俱仍兼舊職安上章辭免 詔曰卿效勞年久特茲陞擢不允所辭 戊午起致仕禮部右侍郎倪謙侍讀學士錢溥于南京管事時南京翰林院署院事陳秉中以憂去舊制吏部具缺內閣奏用翰林官之當次者大學士彭時等言本院學士四員見充經筵講官侍講二員清黃教書乞量陞修撰年深者往蒞院事內批起溥往署院事并起謙于禮部於是六科十

三道交章劾之 上曰朕念錢溥倪謙往勞特起用之所言不准

六月庚申朔 丙寅禮部左侍郎劉吉奉命祭告海嶽還自山東

八月庚申朔 丁丑詹事府少詹事兼學士柯潛卒 潛字孟時福建莆田人景泰辛未舉進士第一授修撰明年陞右春坊右中允仍兼修撰丙子寰宇通志成陞司經局洗馬天順丁丑改尚寶司少卿仍兼修撰己卯充 東宮講讀官 上嗣位以侍從恩陞學士掌院事先是掌院事者多優於文學不屑吏事潛

修舉廢墜一裁以法人頗以是稱之而亦因以構怨
預修 英廟實錄成陞少詹事仍兼學士成化戊子
充日講官是年冬賜講官冠帶潛適聞父喪不出遣
使即賜于家故事四品官父母死有祭無葬特賜以
葬時以為榮踰年復丁母憂會祭酒以罪去欲得老
成者以鎮浮躁時議非潛不可有詔起復潛力辭不
起未幾卒于家潜在太學時亦未有名一登倫魁遽
奮發淬勵學遂大進為文峭厲詩亦有風致為人高
介有節儀觀修整時以公輔望之但其鄉人有上書
攻大學士商輅者或疑潛使之及其守制家居頗為

鄉人所議責備者為之不滿云

十一月戊子朔 甲午左春坊左庶子黎淳省祭以
病踰限二年吏部言例當逮問特宥之 戊申 上
諭大學士彭時等曰朱文公通鑑綱目可以輔經而
行顧宋元二代至今未備卿等宜尊朱子凡例纂編
宋元二史上接通鑑共為一書時等因奏太常卿兼
侍講學士劉珣學士王欽侍讀學士楊守陳尹直左
春坊左庶子黎淳左諭德謝一夔翰林修撰鄭環劉
健汪諧羅璟編修程敏政陸簡林瀚分為七館編纂
明年侍講學士丘濬丁憂起復時等今濬同編纂再

加一館為八館云

成化十年二月丙辰朔 乙亥翰林編修董起省祭
復任

四月乙卯朔 壬申調南京禮部主事林孟和為陝
西慶陽府通判先是孟和言本部侍郎倪謙屢為兩
京科道所論及觀其到任以來貶法徇情市恩釣譽
臣堅以禮法執請謙姑為信從跡其所行誠有如前
所言者矧臣立巳未固而為謙屬吏朝夕相接恐久
而與之俱化伏望調臣別用或罷歸田里貶竄荒域
使再居前職實非臣所願也 詔屬官不知大體撫

拾虛辭毀辱大臣可調邊方

六月甲寅朔 癸亥陞太常卿兼侍讀學士劉珣為
吏部右侍郎仍於經筵會講 巳卯陞檢討吳希賢
為修撰仍支原陞俸一級以九年任滿也

八月癸未朔 癸巳南京國子監祭酒周洪謨起復
至京調國子監先是國子監缺祭酒有 旨待洪謨
起復以聞故有是命

九月癸丑朔 丙辰授監生林載為中書舍人載自
陳其父太常少卿兼侍讀學士文年老致仕家居冀
乞量授京秩得分俸以養 上念文侍從年久特授

載中書舍人

十月癸未朔 癸卯左春坊左庶子兼侍講徐溥服闋至京詔陞少詹事兼侍講學士

十一月壬子朔 庚辰授國子監生楊士儆為中書舍人士儆當選自陳其祖故少師工部尚書謹身殿大學士榮在先朝有輔理功乞量授京職故有是命十二月壬午朔 乙酉陞編修程敏政為侍講仍支原陞俸一級以九年任滿也 庚寅陞編修李東陽為侍講仍支原陞俸一級以九年任滿也

成化十一年正月辛亥朔 己巳陞太子少保吏部

尚書兼文淵閣大學士彭時為少保仍兼舊職理事以九年任滿也

二月庚辰朔 乙酉命詹事府少詹事兼侍講學士徐溥侍讀學士彭華為會試考試官華以疾且有從子入場上疏辭改命侍講學士丘濬 戊子侍講學

士楊守陳以母喪去任賜守陳母太孺人祭不為例從守陳請也 己酉命少保吏部尚書兼文淵閣大

學士彭時戶部尚書兼學士商輅禮部尚書兼學士萬安吏部尚書尹旻戶部尚書楊鼎兵部尚書項忠刑部尚書董芳工部尚書王復太子少保兼都察院

左都御史李賓王越通政司掌司事工部尚書張文質大理卿宋旻學士王獻侍讀學士彭華侍讀學士尹直為殿試讀卷官 戊午授第一甲進士謝遷為修撰劉戩為編修王鏊為編修 辛未少保吏部尚書兼文淵閣大學士彭時卒時字純道江西安福人正統戊辰進士及第授翰林院修撰己巳被命入內閣預典機務母喪乞守制不許陞侍讀景泰初賜金帶及五品服復力請終制許之然因是亦忤 旨迨起復命于翰林院辦事遇易儲遷左春坊大學士修寰宇通志成陞太常少卿仍兼侍讀 英宗復位命

仍入內閣改兼學士 上嗣位陞吏部右侍郎同知經筵事成化元年冬進兵部尚書學士如故二年乞歸省給驛遣中官護行暨抵家手勅隨趣之還 朝以四川宣府遼東地震言十事賜麒麟織金衣總裁英廟實錄成進加太子少保兼文淵閣大學士 慈懿皇太后崩詔大臣集議山陵時上言請如漢文帝葬呂后宋仁宗葬劉后故事 上重違 母后意不從時乃率文武群臣伏文華門號泣以請期在必得上感動卒從之秋彗見又上言乞正宮闈以綿聖嗣且言專寵者年日以邁宜子者恩或未迨宜更新以

回天意蓋人所難言者是冬改吏部尚書賜玉帶五年冬無雪言三事因及景皇帝女固安郡主處西內年及笄遂得下嫁太監劉永成以軍功議欲封伯引成憲阻之或言宋童貫尚封王伯何足惜時折之曰童貫封王在徽宗末年此何等時也遂不果封是年正月考滿陞少保踰月疾復作遂卒年六十贈太師謚文憲遣官諭祭命有司營葬給驛舟歸其喪仍官其子願為尚寶司丞時為人端謹嚴密外和內剛居家孝友蒞官慎職守不妄交人平居無墮容立朝三十年非有疾未嘗不在公公退未嘗語子姪以朝廷事其學本經術而文章純正恪乎儒者也既柄用每朝廷有大政事大議論時持正居多雖不立赫赫名然其所成就隱然一代人望云

四月己卯朔庚辰陞檢討張頤為修撰以九年任滿乙酉勅戶部尚書兼學士商輅兼文淵閣大學士吏部左侍郎劉翊禮部左侍郎劉吉俱兼學士內閣辦事翊吉辭俱得旨卿歷事有年特茲簡任不允辭

五月己酉朔丁卯勅禮部朕皇子年已六歲未有名其與翰林院定議以聞既而擬進上親定睿名

下宗人府書於玉牒 皇子即今 上也母紀氏生時失傳於外廷臣不及致辭奉賀至是已六年矣因乾清宮門災 上欲顯示於衆乃命司禮監太監懷恩等至內閣計議僉議未定良久學士商輅曰若降勅於禮部以擬名為詞則衆不言而自喻矣恩等欣然從之請於 上遂有是命於是中外人心無不悅越數日 上出 皇子於文華門召文武大臣進見又數日 上御文華殿召輅及學士萬安劉翊劉吉至御坐前溫言問曰 皇子既出將何如處之輅等頓首對曰 皇上即位十年儲副未立天下人心

望此久矣今 皇子出實 祖宗之福當立為太子 上曰即舉行乎對曰今天氣向炎各衙門亦有行造俟秋涼舉行 上曰然安復曰 皇子飢飽寒煖之節須勞 聖慮 上頷之曰朕知悉矣輅等退賜酒飯于文華門外命太監懷恩覃昌待之

六月戊寅朔 辛丑編修喬惟翰乞歸省親許之 乙巳 皇子母紀氏薨追封淑妃謚恭恪莊僖輟朝三日 上服淺色衣御奉天門視事命禮部定喪葬儀註

八月丁丑朔釋奠先師孔子遣戶部尚書兼文淵閣

大學士商輅行禮

九月丁未朔 癸卯陞編修謝鐸為侍講仍支原陞俸一級以九年任滿也 辛未陞編修倪岳為侍讀仍支原陞俸一級以九年任滿也

十一月丙午朔 丙寅陞侍講學士尹直為禮部右侍郎

成化十二年二月乙亥朔 丙戌手勅陞戶部尚書兼文淵閣大學士商輅為太子少保改吏部禮部尚書兼學士萬安改戶部俱兼職如故仍理內閣事輅上疏辭免 上曰卿職居輔導歷事有年特茲加陞

所辭不允 辛丑陞編修陳音為侍講仍支原陞俸一級以九年任滿也

三月甲辰朔 庚戌故禮部左侍郎兼學士劉定之生母封太淑人劉氏卒其孫中書舍人稱奏乞葬祭詔止於一祭

四月甲戌朔 庚子陞編修焦芳為本院侍講仍支原陞俸一級以九年任滿也

六月壬申朔 丁丑致仕太常少卿兼侍講學士林文卒文字恒簡福建莆田人宣德庚戌進士及第除編修正統初與修 宣廟實錄書成陞修撰兩為會

試考官景泰中歷陞左春坊左諭德兼修撰進左庶子兼侍講預修寰宇通志天順初以景泰中東宮官改尚寶司卿仍兼侍講尋轉學士上在東宮文與講讀屢引年英宗重其人不許上即位褒進舊學之臣陞太常少卿兼侍讀學士越月懇乞致仕歸至是卒年八十餘贈禮部左侍郎遣官諭祭命有司治塋事官其子載為中書舍人戊戌陞修撰劉健汪諧為右春坊右諭德編修周經為本院侍講以九年秩滿也

十二月庚午朔 癸酉太監懷恩傳奉 聖旨南京

禮部左侍郎倪謙陞本部尚書侍讀學士錢溥陞南京吏部左侍郎國子監祭酒周洪謨陞禮部右侍郎仍掌監事 戊寅陞侍講徐瓊為南京侍讀學士乙酉禮部右侍郎尹直以父喪去任父奩重曾封為侍讀學士乞祭允之先是禮部以朝臣父母死乞恩祭葬者衆奏准非授本等封贈者不與行之數年頗見有節至是直父例不應得乃破例而為之尚書鄒幹無如之何然自是比例乞恩者接跡而恩典之濫亦無紀極矣

成化十三年正月庚子朔 戊辰陞編修陸簡為侍

講以九年任滿也 己巳以增孔子籩豆樂舞之數
遣吏部尚書兼文淵閣大學士商輅告文廟學士王
獻告于闕里 陛編修費閭為國子監司業

二月庚午朔 丁丑釋奠先師孔子遣吏部左侍郎
兼學士劉珣行禮

三月戊辰朔 己卯命國子監祭酒耿裕經筵侍班
壬辰贈禮部左侍郎致仕許彬為資善大夫禮部尚
書從彬子典籍越之請也不與謚 丙申侍讀學士
江朝宗服闋至南京得疾乞還鄉調治吏部請令應
天府給醫藥俟疾愈赴京從之

四月戊戌朔 乙巳 手勅以太子少保吏部尚書
文淵閣大學士商輅兼謹身殿大學士加戶部尚書
兼學士萬安太子少保陞吏部左侍郎劉珣禮部左
侍郎劉吉俱本部尚書仍兼學士時輅等被 旨修
續通鑑綱目成故有是命吉初在禮部不與修纂至
是奏乞辭免陞職以為內閣密勿之地猥以菲才而
濫居久懷尸素之慙尚書六卿之尊今又無功而加
授實增過分之愧雖天恩無私於覆載柰臣勞未效
於纂修是以聞命驚惶不敢即受伏望追寢成命俾
仍舊職勉圖報稱 上曰卿歷任年久特茲陞擢不

允所辭 復命纂修官學士王猷陞少詹事仍兼學士左春坊左庶子黎淳少詹事兼侍讀學士彭華侍講學士丘濬左諭德謝一夔俱學士右諭德劉健汪諧左右庶子侍講程敏政陸簡左右諭德修撰鄭環羅璟司經局洗馬編修林瀚修撰

五月丁卯朔 甲戌罷西廠之緝事者時太監汪直行事官校勢益橫公私騷擾道路以目朝士亦皆惴惴不自安內閣大學士商輅學士萬安劉珣劉吉極言汪直并韋英王英之害數千言 上震怒命司禮監太監懷恩覃昌黃高至閣下厲色傳 旨謂輅等

曰朝廷用汪直緝訪奸弊有何壞事爾等遽此說來是誰先主意輅等對曰汪直違 祖宗法壞 朝廷事失天下人心輅等同心一意為 朝廷除害無有先後恩曰不然 聖意疑此奏未必四人同然下筆必有先之者安曰汪直挾勢害人人人要說但不敢耳某等同受 朝廷厚恩同一主意誰獨為先珣奮然泣曰某等奉侍 皇上於青宮今幾二十年幸而朝廷清明四方無事今忽汪直為害使遠近不安何忍坐視某等誓不與彼共戴天吉曰汪直之罪縱使某等不言不日必有言之者今既奏入貶謫黜罰亦

惟命耳所不避也懷恩降辭色徐曰 朝廷命恩等
問具奏之由今皆執論如此當具實回話倘 上召
問辛勿變前言輅等曰諾恩等去輅舉手加額曰衆
先生皆為 朝廷任事如此輅復何憂萬安等三人
隨侍青宮輅以先朝舊臣恐 上疑已且慮三人者
或不同心故云然也已而恩等復至傳 旨曰卿等
所言良是汪直壞事朕實不知今便革去西廠散遣
官校卿等各安心辦事輅等皆頓首謝恩曰先生不
知吾輩數人者已箝其口問為誰曰黃賜陳祖生也
皆闌在東華門外不容進見矣汪直謗其福建人與

楊畢通 上疑此奏出二人所使翌日兵部尚書項
忠具奏草會諸部院大臣共上之奏留中不出遂罷
西廠召恩數直罪而責之退還本監調韋瑛于邊衛
差操散諸旗校還錦衣衛因奏直所遣旗校在外者
二十人日久未還命都察院移文令巡按御史隨處
出給告示曉諭人心不得留滯人心快之然 上意
猶未釋然也 初尚書項忠具奏草令武選郎中姚
璧持赴吏部尚書尹旻請署名旻曰本兵部所撰當
以兵部為首璧曰公卿之首以次當吏部為首旻曰
今日纔認得六卿之長既署名即遣人報韋瑛曰本

兵部所寫某但以次居首耳又數日都御史王越遇
珣與吉扞早朝越曰汪直行事儘公道如黃賜專權
納賂非直誰能去之且商萬二公在任久是非多故
有所忌憚二先生入閣幾日况直又扶持何為亦列
乎珣默然吉曰不然其等言事為朝廷非為身謀也
設使汪直行事皆公道朝廷置公卿大夫欲何為天
下後世謂此為何等時也越無以應遂與吉踈

六月丙申朔 庚戌監察御史戴縉假災變陳言惟
太監汪直緝捕楊暉吳榮等之奸惡高崇王應奎之
賊貪又如奏釋馮徽等冤抑之軍囚禁裏河害人之

宿弊是皆允合人心足以服人而警衆者也扞是直
復開西廠洞察益苛人不堪命至有破家毀族者勢
焰熏灼天下聞而畏之其禍端實肇扞縉 丁巳太
子少保吏部尚書兼謹身殿大學士商輅奏乞休致
詔曰卿歷練老成朕方倚任但自陳衰朽力求退休
特茲俞允以遂優閒陞少保仍賜勅給驛還鄉輅上
章辭免少保之職 詔復謂卿輔導有年今乞休致
特有此擢不允所辭 乙丑太子少保戶部尚書兼
學士萬安戶部尚書兼學士劉珣禮部尚書兼學士
劉吉俱自陳乞罷免 詔曰卿等職居輔導朕方倚

任宜盡心幹濟所辭不允

七月丙寅朔

辛未詔翰林院會內閣自覈其官屬

時考覈諸司官屬俱聽吏部都察院會覈而獨翰林以文學侍從為職故聽其長自覈焉 命左春坊左

庶子劉健侍讀周經為應天府鄉試考試官 戊寅

命內閣考覈左右春坊司經局時遇例考覈右庶子

汪諧等以為請

上命大學士萬安等考之 辛卯

詹事府少詹事兼侍講學士徐溥以母喪去任 陞

國子監祭酒耿裕為吏部右侍郎

八月乙未朔 己未陞學士丘濬為國子監祭酒

甲子陞檢討傅瀚為修撰以九年任滿也

九月丙子南京吏部左侍郎錢溥自陳乞免 上曰

溥年雖七十精力尚健仍留供職不允辭 庚辰南

京禮部尚書倪謙自陳乞致仕許之

十月乙未朔 壬寅侍讀學士江朝宗服闋至京命

復任

十一月甲子朔 丙寅嚴文武官乘轎之禁太監汪

直言洪武永樂間人臣無敢乘轎者正統時文官年

老或乘肩輿景泰以來師保既多延至于今兩京五

品以上無不乘轎者文職三品年六十以上可許武

臣宜一切禁止從之本稿吳綬所撰也是時都御史
王越尚書尹旻及戴縉吳綬皆為直心腹而學士劉
珣為越所誘亦與直通數人者凡有謀議直逕達於
上輒見施行人皆畏懼雖司禮當道亦謹避之云
巳丑致仕太常卿兼侍讀學士孫賢卒賢字舜卿河
南杞縣人景泰甲戌進士授修撰寰宇通志成陞侍
講天順初改左春坊左中允侍 東宮講讀 上即
位進太常少卿兼侍讀修 英宗實錄成進太常卿
兼侍讀又進兼侍讀學士時成化庚寅歲也逾年請
立 皇太子且引疾乞致仕以示無希覬意章並上

上皆允之 皇太子立是為悼恭太子賢回家憤憤
不樂而難于言至是卒年五十四訃聞贈禮部左侍
郎兼學士命有司祭葬如例賢起諸生不十年至通
顯然無大過人者性剛急人或勸之學艱然怒曰今
人皆一般孰為程朱孰為韓柳護邪忌才不能容物
其輕於舉動尤為人所哂云

十二月丙午朔 丁酉給戶部尚書兼學士劉珣禮
部尚書兼學士劉吉應得誥命時珣父七十七吉父
八十六乞榮生前詔特許之

成化十四年二月甲午朔 庚子命禮部尚書兼學

士劉吉學士彭華為會試考試官賜宴於禮部 戊申皇太子出閣進學命太子少保戶部尚書兼文淵閣大學士萬安戶部尚書兼學士劉翊禮部尚書兼學士劉吉提調各官講讀太常少卿兼學士王獻詹事府少詹事兼侍讀黎淳學士謝一夔右春坊右庶子汪諧司經局洗馬鄭環羅璟更番侍班學士彭華待讀學士江朝宗左春坊左庶子劉健左諭德程敏政侍讀周經修撰陸鈇張昇張頤更番講讀經改右中允昇改左贊善修撰傅瀚兼校書太常少卿謝宇禮部員外凌暉兼正字通事舍人二員改鴻臚寺序

班耿寧紀本為之

三月癸亥朔 庚午陞南京太常少卿李本為南京禮部右侍郎 丙子以太子少保吏部尚書兼謹身殿大學士萬安太子少保戶部尚書兼文淵閣大學士劉翊太子少保禮部尚書兼文淵閣大學士劉吉太子少保吏部尚書尹旻兵部尚書余子俊刑部尚書林聰工部尚書王復太子少保兵部尚書兼都察院左都御史王越掌通政司事工部尚書張文質戶部右侍郎邢簡大理卿宋旻詹事府少詹事兼侍讀黎淳學士謝一夔侍讀學士江朝宗充殿試讀卷官

乙酉授第一甲進士曾彥修撰楊守陟曾追為編修
丙戌選進士梁儲張潔陳璫楊傑敖山劉忠孫珪于
材王珣劉允中張璞徐鵬汪藻鄧焮林霄江瀾張九
功陳邦瑞馬廷用荆茂劉機李經謝文張芮倪進賢
楊廷和楊時暢武衛改庶吉士讀書績文命學士王
獻謝一夔教之

四月壬辰朔 戊申陞編修李仁傑為本院侍講以
九年考滿也

五月壬戌朔 甲子編修董越以母喪去任 癸酉

陞詹事府少詹事兼侍讀黎淳為吏部右侍郎 丙

子以修撰張頤為右僉都御史巡撫宣府

六月辛卯朔 壬寅陞司經局洗馬鄭環為南京太
常少卿

十月己丑朔 丁未左春坊左庶子諭德程敏政奏
乞歸省許之給驛以往且命亟還供職 庚戌手勅

陞太子少保吏部尚書萬安為太子太保仍兼謹身
殿大學士安上疏辭 詔曰卿職居輔導效勞有年

特茲加陞用隆委任不允辭 辛亥學士楊守陳服
闋復任

十一月戊午朔 己未 萬壽聖節始令翰林院官

習儀先是翰林院官僚自永樂宣德以來相傳免習儀至是錦衣衛緝事官校奏學士王獻檢討張泰不赴習儀 上命鞠問之獻泰舉相傳之例以聞宥之仍 詔自今行大禮先期習儀內閣辦事者免其餘習儀如常

十二月戊子朔 辛丑前太常少卿兼侍讀牛綸奏臣起進士擢編修累至前官以臣叔太監王有罪奪職閑住今王蒙恩復任乞念臣講讀舊勞量授一官與王相依以終餘年疏入命為南京太常寺丞 壬子陞學士彭華為正詹事

倪謙卒

成化十五年正月戊午朔 丙戌追封故少詹事兼國子監祭酒司馬恂為禮部侍郎從其子恂請也 三月丁巳朔 甲戌致仕南京禮部尚書倪謙卒謙字克讓應天府上元人己未進士第三人授編修滿九載進侍講改左春坊左中允兼侍講進侍講學士仍兼中允修寰宇志成進左春坊大學士兼侍講英宗復辟改通政司左叅議仍兼侍講遣祭遼荆楚三府先王歸進學士 上復正儲位充講讀官歲己卯主考順天府鄉試舉子有不中者掇拾謙陰事付行事校尉發之謫戍開平 上即位遇恩例放免明

年謙上疏自陳得復學士閒住尋復入史館修英
廟實錄陞禮部右侍郎監察御史陳選抗疏極言之
上為寢成命罷謙致仕後七年復起為南京禮部右
侍郎未幾為本部尚書以疾復致仕至是卒贈太子
少保謚文僖賜祭葬如例謙生有異質體四乳目光
突出自幼穎異善屬文才氣飄逸入翰林與錢溥齊
名謙比溥稍莊重但好交匪人竟以是取敗嘗使朝
鮮人服其敏捷景泰中別選內官之聰慧者數人俾
謙教之後俱柄用謙躓而復起者此數人力也子二
人俱登進士第岳今為禮部左侍郎阜工部主事

乙亥南京太常少卿劉宣服闋復任

五月丙辰朔 甲子修撰吳寬服闋復任 戊辰調

學士江朝宗于外任太監汪直以朝宗與都御史牟

俸有連也 丙子特加工部尚書萬祺太子少保先

是 皇太子出閣六卿皆加保傅祺時理易州山廠

不與竟寅緣得之祺起吏胥所理者柴炭之事而居

保傅之位大臣不敢執正言官亦無敢進諫者 己

卯右春坊右庶子汪諧以母喪去任

七月乙卯朔 壬戌改禮部右侍郎尹直為南京吏

部右侍郎以親喪服闋也

萬祺以吏胥
為少保

楊鼎致仕

十月癸未朔 癸巳太子少保戶部尚書楊鼎再乞致仕詔曰朕以卿久練部事方隆委任但累乞致仕特允所請其令有司月給米二石人夫四名應用以副朕優老之意仍賜之勅曰卿發身賢科歷官翰苑纂修講讀効勞良多逮遷戶部殫心經理國賦通融厥績茂焉朕方圖任老成功于倚毗卿乃引年至再欲遂閒適茲特允所奏命給驛舟送卿還鄉仍令有司月給米二石歲撥人夫四名以備贍用夫優老敬賢者朕之心執禮養恬者卿之志卿其篤念乎此優游田里化導鄉人使風俗歸淳治理臻盛則足以副

朕眷遇至意卿豈不亦永終譽哉先是大臣致仕未有給米撥夫之例有之實自鼎始人咸謂朝廷優老敬賢之意良不為過云 庚戌陞侍講李永通為侍講學士九年秩滿也

閏十月癸丑朔 庚午南京吏部左侍郎錢溥以進慶賀萬壽聖節表文至京因上章乞致仕 上曰卿歷練老成事朕春宮及今有年正宜委任但屢乞休老特允所請陞本部尚書致仕給誥命仍賜勅給驛舟還鄉溥辭免尚書之命不許

十一月壬午朔 庚寅編修劉戩服闋復任

十二月壬子朔 丁巳陞左春坊左贊善張昇為左
諭德以九年秩滿也 辛丑給故南京禮部尚書贈
太子少保謚文僖倪謙太常卿兼侍讀學士贈禮部
左侍郎兼學士孫賢詹事府少詹事兼國子監祭酒
贈禮部右侍郎司馬恂誥命

成化十六年七月己卯朔 甲申國子監司業費閏
乞歸展省許之 丁亥侍講彭教卒教字敷五江西
吉水人甲申廷試第一授修撰修 英廟實錄成進
侍講侍經筵至是卒年四十二教性穎敏讀書數遍
即成誦及長博通群籍善屬文博辨贍麗既入翰林

稍改歛而過刻厲為人頗尚氣不肯下人同輩多不
喜之因鬱鬱成疾遂不起作詩或寓譏諷意狀元張
昇歸省郊餞以詩何用有才如董賈不愁無命到公
卿之句或謂去其上二言只作五言詩可謂教挽詞
至是果卒時人傳以為口實 戊子命司經局洗馬
羅璟侍講李東陽為應天府鄉試考官

八月戊申朔 壬子陞國子監祭酒丘濬為禮部右
侍郎仍掌監事 癸丑命侍講學士楊守陳右春坊
右諭德陸簡為順天鄉試考官

九月戊寅朔 庚辰禮部左侍郎俞欽以憂去任

食... 卷之六
戊戌陞禮部右侍郎周洪謨為左侍郎學士謝一夔為右侍郎

十月丁未朔 乙卯陞少詹事兼侍講學士徐溥為太常卿兼學士仍舊視事 己未編修尹龍為侍講檢討張泰為修撰俱以九年秩滿也

十二月丙午朔 乙丑授庶吉士梁儲張濬楊傑敖山劉忠于材徐鵬鄧焮馬廷用為編修劉機楊廷和楊時暢武衛為檢討陳璫汪藻王珣張九功孫珪張璩林霄劉允中為給事中荆茂李經謝文倪進賢為御史

成化十七年二月乙巳朔 辛亥命太常卿兼學士徐溥少詹事兼學士王獻為會試考官 庚午陞禮部左侍郎周洪謨為本書太常卿兼學士徐溥為禮部左侍郎

三月乙亥朔 庚辰命禮部左侍郎兼學士徐溥仍為講官 戊子命太子太保吏部尚書兼謹身殿大學士萬安太子少保戶部尚書兼文淵閣大學士劉珣太子少保禮部尚書兼文淵閣大學士劉吉太子太保吏部尚書尹旻太子太保威寧伯兼都察院左都御史王越戶部尚書翁世資掌鴻臚寺事禮部尚

書施純兵部尚書陳鉞太子少保刑部尚書林聰工部尚書劉昭通政使何琮大理卿宋旻詹事府詹事彭華為殿試讀卷官 戊戌授第一甲進士王華為修撰黃珣張天瑞編修

四月己巳朔左春坊左中允周經乞省親許之

五月乙亥朔 戊戌編修丁溥居家與華亭縣主簿梁桂乘醉忿爭桂因奏發其平日請託諸事事連御史柳淳命俱執問如律

七月甲戌朔 辛卯致仕太常卿兼侍讀學士吳節卒節字與儉江西安福人宣德庚戌進士選庶吉士

吳節卒

授編修秩滿陞侍讀景泰立陞南京國子監祭酒滿九載加從三品祿 上初即位修 英廟實錄以節嘗與修 宣廟實錄知典故召為付總裁既至改太常少卿兼侍讀學士書成進本卿兼官如故未幾丁母憂賜祭塋服除詣闕謝遂乞致仕時年已七十餘既得請家居十餘年卒年八十五訃聞遣官祭節為人平易質直信人不疑為文如其為人初治春秋學與同學劉球齊名又同入翰林學春秋者多師二人而節之徒尤衆後進宗之安福春秋遂擅名於天下其為祭酒承陳敬宗之後敬宗師道嚴甚流為寡

恩節矯之以寬士類悅服久之流于縱弛然聲望遠
不逮敬宗

八月癸卯朔 庚戌賜故少保吏部尚書兼文淵閣
大學士彭時父毓義祭塋毓義以子貴受封至是卒
有司以聞故有是命 壬戌編修董越服闋復任

九月壬申朔陞編修商良臣為侍講以九年任滿

十月壬寅朔 壬戌賜太子太保吏部尚書兼謹身
殿大學士萬安誥命授從一品散官勲階

十二月辛丑朔 甲辰命詹事府詹事彭華兼學士
仍掌府事

成化十八年正月庚午朔 庚寅太子少保禮部尚
書兼文淵閣大學士劉吉父封禮部尚書兼學士劉
輔卒吏部以聞有 旨令吉奔喪安葬畢日復任禮
部奏請祭塋皆宜如楊溥李賢父例從之仍命給驛
歸喪賜賻甚厚 壬辰大學士劉吉具疏乞終制得
旨朕以卿輔臣特令奔喪葬畢即來供職不准終制
丁未大學士劉吉具疏再乞終制得 旨卿盡心輔
理即同孝道不許固辭 陞修撰陸鉞為右春坊右
諭德以九年任滿也

二月庚子朔 戊辰編修劉震服闋復任

萬安邪媚小人而能請罷西廠此亦杜稷之利而劉文和不署名以致人疑開議說之端與前注詳之對不與汪直並戴天者何大異也

三月己巳朔 壬申復罷西廠太監汪直既在大同不得還六科十三道交章奏其苛察紛擾大傷國體得 旨朝廷自有處置於是內閣臣太子太保萬安約太子少保劉珣曰西廠為害久矣今科道官欲革之朝廷不從吾輩豈可坐視當有以勸 上宜從衆言珣不然曰西廠行事有何不公道也安曰公不欲吾自為之乃自署名題 云云 疏入 上乃罷西廠中外欣然珣有慚色

四月己亥朔 辛丑右春坊右庶子汪諧服闋復任南京太常少卿鄭環卒環字瑤夫浙江仁和人天順

庚辰進士及第授編修預修

英廟實錄書成遷修

撰續資治通鑑綱目成轉司經局洗馬未幾擢南京太常少卿至是以三年考滿入朝卒于旅寓賜以祭如例環性方介自守有所不為為文不尚華藻所至與人多不合其在太常寮案頗不堪之然無他勝人亦不深咎云 丁卯編修王鏊服闋復任

五月己巳朔 辛巳陞南京太常少卿劉宣為本卿掌國子監事寺丞牛綸為少卿 辛卯太子少保禮部尚書兼文淵閣大學士劉吉奔喪居家以不允終制復馳奏辭甚懇切奏上 詔曰葬事既畢卿宜還

劉吉奪情起復

京就職務圖公義豈可昵於私情又求終制不允仍
賜璽書遣鴻臚寺官齎往趣之曰卿喪事已畢亦可
少輸人子之情而可念念私恩力求終制至於再三
乎傳不云無私恩非孝子無公義非忠臣今卿受直
密勿之地非他百職事比勅至須束裝來京公爾忘
私以勉副委任故勅

七月戊辰朔 壬申命太子少保禮部尚書兼文淵
閣大學士劉吉復任視事以奔喪事竣勅取回京也
甲申命雲南布政歲祭故學士謚忠文王偉從巡撫
雲南右副都御史吳誠奏也 戊子授庶吉士江瀾

為編修張芮為檢討

十月丙寅朔 壬午詹事府詹事彭華為其鄉人所
訐 詔宥其罪停俸半年

十一月乙未朔 庚申陞編修董越為侍讀以九年
秩滿也

十二月乙丑朔 庚午御製文華大訓成其書綱凡
四曰進學曰養德曰厚倫曰明治目二十有四 辛
未手勅陞太子太保吏部尚書萬安為太子太傅兼
華蓋殿大學士太子少保戶部尚書劉珣為太子太
保兼謹身殿大學士太子少保禮部尚書劉吉為太

文華大訓成

子太保武英殿大學士尚書俱如故安等辭 上曰
卿等輔導有年盡心厥職特茲加陞用副委任所辭
不允 陞詹事府詹事兼學士彭華從二品俸少詹
事兼學士王猷為太常卿兼侍讀學士侍講學士楊
守陳少詹事仍兼舊職侍讀倪岳學士時文華大訓
書成華等以采輯有勞故也

成化十九年二月甲子朔 辛未賜太子太保戶部
尚書兼謹身殿大學士劉珣太子太保禮部尚書兼
武英殿大學士劉吉誥命追封三代時珣奏其父年
八十有三乞預賜誥命使得以生享榮恩 上特許

之因并賜吉

三月癸巳朔 壬寅陞侍講陳音為南京太常少卿
七月辛卯朔 庚子命左春坊左諭德張昇侍講商
良臣為應天府鄉試考官

八月辛酉朔 丙寅命學士倪岳侍讀董越為順天
府鄉試考官賜宴于順天府

九月辛卯朔 甲午授吏部聽選監生陳獻章翰林
院檢討而聽其回 巳酉命禮部左侍郎徐溥兼學
士仍理部事

十月庚申朔 辛巳禮部右侍郎謝一夔請追封其

前母許之一夔援吏部尚書曹鼐及戶部尚書楊鼎
例以請 上特允之不為例

十一月庚寅朔 戊戌陞編修王臣為侍講以九年
秩滿也

十二月庚申朔 丁丑陞修撰謝遷為右春坊右諭
德以九年秩滿也

成化二十年二月戊午朔 丙子命詹事府詹事兼
學士彭華左春坊左庶子劉健為會試官賜宴于禮
部 丙戌以太子太傅吏部尚書兼華蓋殿大學士
萬安太子太保戶部尚書兼謹身殿大學士劉珣太

子太保禮部尚書兼武英殿大學士劉吉太子太保
吏部尚書尹旻掌通政使司事太子少保禮部尚書
張文質掌鴻臚寺事禮部尚書施純兵部尚書張鵬
刑部尚書張瑩工部尚書劉昭都察院右都御史李
裕戶部左侍郎潘榮大理卿宋旻太常卿兼侍講學
士王獻侍講學士李東陽充殿試讀卷官

三月戊子朔 丙申授第一甲進士李旻為修撰白
鉞王勅為編修

四月丁巳朔 癸未改南京叅贊機務兵部尚書陳
俊為南京吏部尚書巡撫南直隸兵部尚書王恕於

南京兵部叅贊機務陞南京禮部左侍郎李本為本部尚書南京吏部右侍郎尹直為南京禮部左侍郎六月丙辰朔 丙寅禮部左侍郎兼學士徐溥奏乞以其子元概循例入監 上念溥侍從春宮舊勞特官元概為中書舍人 戊辰 上諭吏部臣曰內閣萬安劉珣劉吉事朕春宮及今講讀輔導効勞有年特各官其一子為中書舍人蓋因元概恩推及之也安乃以孫弘珩珣以子銳吉以子常應詔遂皆官之既而弘珩銳自陳年幼未能供職欲辭月俸不許十月乙卯朔 庚辰陞修撰吳寬為右春坊右諭德

以九年秩滿也

成化二十一年正月甲申朔 丁未太子太傅吏部尚書兼華蓋殿大學士萬安等以星變各辭其子及孫中書舍人之職得 旨卿等事朕春宮輔導有年特各錄用一子以酬其勞俱不允二月癸丑朔 戊辰陞侍講焦芳為侍講學士以九年秩滿也四月壬子朔 己卯陞修撰吳希賢為左春坊左諭德仍支原俸一級以九年秩滿也

五月庚戌朔 甲子吏部右侍郎黎淳引奏考滿官誤稱其姓翼日始具疏服罪 上責其怠慢而宥之

劉翊致仕

六月庚辰朔 甲午太子少保戶部尚書楊鼎卒 鼎字宗器陝西咸寧人 正統己未會試第一 廷試進士及第 授編修 詔簡講讀 以下有才器者十人 進學東閣 鼎居其一 修五倫書 預校勘 十四年 北虜犯順 命慎選諸司 有治才者 分守要地 鼎改御史 蒞兗州 振勵有法 事平 復舊職 陞侍講 兼左春坊左中允 同考禮部會試 尋陞戶部右侍郎 天順改元 陞左侍郎 成化戊子 陞尚書 進太子少保 因言者乞致仕 至是 卒年七十七 贈太子太保 謚莊敏 賜祭 命官管葬 九月己酉朔 甲子 太子太保戶部尚書 兼謹身殿

大學士劉翊致仕 翊上疏 上曰 卿朝廷舊臣 方隆委任 今以疾乞休 情詞懇切 特茲俞允 賜勅給驛 還家有司 月給米五石 歲撥人夫八名 翊又奏 臣子銳為中書舍人 纔十歲 鈔禮部司務 故多疾 二子皆虛糜廩祿 無益公事 乞令還鄉 隨臣讀書 許之初 翊侍上春宮 講讀久及 即位 屢進清秩 入內閣 任益崇 重至是前 一日 申刻 太監覃昌傳 旨召學士萬安 劉吉 赴西角門 翊欲往 召者止之 安等至 昌出紙一緘 其上朱書一封 字乃 御筆也 啓視 則人訐翊陰事者 曰 劉翊嗜酒 貪財 好色 與太監某親 縱子姦宿 樂

婦納王越銀謀與復爵 朝廷若不去珣必壞大事
等語安等驚曰此即匿名文書告言人罪者律有明
禁 朝廷何不火之召安等看何為且珣在內閣與
安等同出入曖昧之事何由而明其子之過雖珣或
有不知也惟冀太監扶持為幸昌曰其扶持久矣向
科道官劾汪直本 上已訝其無名今 聖意堅不
回二先生若不作計處明日行事本發出則無及矣
安等曰必不得已珣親已老俟其親終守制而回何
如曰不能待也曰不然令珣自陳休致厚加恩典以
為儒臣遭際之榮以全君臣始終之義昌曰上意正

如此可達劉先生以親老為辭速進本來遂各退翌
日珣進本 上怒無養事命昌問安等曰此本乃珣
於四月間聞人言其過失於上而預先撰就者不暇
改寫遂填月日以進昌回奏 上意解特允之加恩
從厚蓋 上聖度汪涵篤念舊臣於珣曲賜保全如
此匪直珣感恩無窮凡為大臣者苟無大故終 上
之世信任無間其或有故不得已去之多從輕典無
不感激云

十二月戊寅朔 甲申賜手勅改太子太保禮部尚
書劉吉為戶部尚書謹身殿大學士詹事彭華為吏

部左侍郎仍兼學士入內閣叅預機務華具疏辭謝
上曰卿供職年深特茲簡任不允所辭

成化二十二年正月戊申朔 戊辰陞左春坊左庶
子劉健為詹事府少詹事供職如故以九年秩滿也
二月丁丑朔 甲申陞修撰林瀚為左諭德以九年
秩滿也

三月丙午朔 甲子改南京禮部左侍郎尹直于兵
部直內附當道中貴而外則少傅萬安為之力援也
五月乙巳朔 乙丑侍講尹龍有罪除名并革其父
吏部尚書尹旻太子少保令致仕時東廠官校發龍

旻是文勒致仕

諸陰事下錦衣衛獄既而科道交章論之 上曰尹
旻姑不逮問三法司錦衣衛其執尹龍并張璠王範
於午門前拷訊明白仍究其有如璠等親昵請託營
求陞職者具奏以聞於是禮部郎中劉紳兵部員外
郎董寧常德府同知朱紳按察司副使謝顯王錦馮
蘭名俱及焉獄上得 旨尹旻聽子納賄徇情陞官
大壞選法仍革太子少保止令以尚書致仕龍馮籍
父勢交結愉邪濫受賤私發原籍為民璠範降三級
調除遠方劉紳等令各執問侍郎耿裕等 上責其
職佐銓衡乃旁視緘默曲意阿從致從陞擢不公法

當逮問姑宥之仍停俸三月已而降璲等命巡按御史執問顯錦蘭及朱紳來奏

六月甲戌朔 癸巳陞修撰兼校書傅瀚為左春坊左諭德兼檢討供職如故以九年秩滿也

七月甲辰朔 丙辰命右春坊右庶子汪諧左春坊左諭德程敏政為應天府鄉試考官 辛酉致仕少

保吏部尚書兼謹身殿大學士商輅卒輅字弘載浙江淳安人宣德乙卯鄉試又十年始登進士及第鄉試會試殿試俱第一初授修撰丁卯歲 英宗命選講讀以下十人進學東閣輅與焉己巳之變 英宗

少保大學士
商輅卒

北狩 景皇帝即位召入內閣參與機密陞侍讀是時北虜方熾而閩浙盜又起奏牘填委輅悉心參佐勞效為多景泰庚午陞學士 英宗至自虜庭 景皇帝遣輅至居庸關奉迎還壬申陞兵部左侍郎兼學士并左春坊大學士賜以居第丁丑 英宗復辟石亨嗾言官劾之坐除名成化丙戌召起復原任仍參預機密首言八事切時政戊子 慈懿皇太后崩輅率群臣上䟽定祔葬之議從之是歲陞兵部尚書仍兼職如故癸巳內官監管皇莊者害人輅言天子以天下為家何以莊為 上嘉納之改戶部仍兼舊

職修續資治通鑑綱目成兼文淵閣大學士丙申加
進太子少保改吏部時倖臣有欲於掖廷建玉皇祠
每歲以內臣執事如郊祀儀祭之者輅力言止之宮
門災工部請差內外官徵材湖廣等處輅言上天垂
戒宜少緩修葺以存警戒從之丁酉命兼謹身殿大
學士時汪直開西廠行事大肆羅織屢起大獄勢焰
薰灼人不敢言輅偕同列上疏極言之會六部大臣
亦以為言遂革西廠由是見憾於直會故大學士楊
榮曾孫擘有罪不就逮赴京避罪為直所發語連輅
輅遂乞致仕詔進少保賜璽書給驛以歸至是卒七

十三計聞贈特進榮祿大夫太傅謚文毅遣官諭祭
命有司營塋域輅體貌修偉風神雅秀文章典實不
事華藻為人平粹簡重寬厚有容登第甫六年即入
內閣預機務儕輩多有異議而輅處之自如尤與錢
溥不相能溥至為禿婦傳譏之亦不與之較其再起
也黎淳以景泰中易儲事專歸咎於輅上章攻之輅
待之無異平時君子謂其有大臣之量云子良臣中
進士為侍講次子良輔刑部主事孫汝謙尚寶司丞
以蔭得官 戊辰吏部右侍郎黎淳齋日杖吏為吏
奏發服罪 上曰淳身居重任當謹守禮法以御下

人何為責吏有犯齋禁本當究治但既輸服姑宥之
仍停俸兩月 壬申降侍講學士焦芳為湖廣桂陽
州同知先是芳與侍講尹龍為同官往還甚密會兵
部郎中鄒襲坐罪龍嘆軍官奏保復職芳頗與聞其
事仍為東廠官校緝知以聞逮錦衣衛鞠之獄成刑
部擬罪贖杖還職有 旨芳居官翰林乃違法代人
具奏草持身不謹難任京職令吏部降二級調外任
八月癸酉朔 巳卯命侍講學士李東陽左春坊左
諭德傅瀚為順天府鄉試考官賜宴本部 甲申降
編修王敕為湖廣夷陵判官御史呂璋劾與尹龍往
來出妻行酒醜聲外聞 巳丑陞吏部左侍郎耿裕
為本部尚書

九月癸卯朔 丁未左春坊左諭德林瀚乞歸展祭
許之 壬子調司經局洗馬羅璟為南京禮部員外
郎時璟起復以復任請有 旨羅璟丁憂日久吏部
何不補缺必待璟服滿方奏璟不許復任調南京部
屬耿裕等可自陳狀裕等引罪命姑宥之故事洗馬
非常選官不當補缺以璟與侍講尹龍有連故責及
之然亦由其鄉人欲謀侍東宮講讀而璟適至嗾李
孜省為之也 丁卯手勅改兵部左侍郎尹直為戶

部左侍郎兼學士入內閣叅預機務直辭謝上曰
卿久在翰林才識老成特茲簡用不允辭 戊辰命
編修梁儲兼司經局校書

十月壬申朔 丁丑調吏部右侍郎黎淳于南京吏
部奪尚書耿裕俸兩月文選司官吏三月 庚寅調
吏部尚書耿裕于南京禮部改工部尚書李裕禮部
左侍郎徐溥于吏部溥仍兼學士陞掌大理寺事工
部尚書杜銘為刑部尚書禮部右侍郎謝一夔工部
尚書左通政黃景禮部左侍郎兵部右侍郎何琮本
部左侍郎南京太常卿劉宣吏部翰林學士倪岳禮

部巡撫延綏右僉都御史呂燾兵部俱右侍郎右僉
都御史邊鏞左副都御史馮貫改大理卿 己亥手
勅加英國公張懋保國公朱永太傅兼太子太師襄
城侯李瑾定西侯蔣琬新寧伯譚佑昌寧伯趙勝太
保兼太子太傅大學士萬安陞少傅兼太子太師劉
吉少保兼太子太傅尚書大學士如故侍郎彭華陞
禮部尚書尹直兵部尚書俱加太子少保仍兼學士
安等三人上疏辭謝時華以病在京亦辭 上優詔
答之不許

十二月壬申朔 辛丑侍講學士李東陽以父喪去

任

成化二十三年正月壬寅朔 丁卯陞南京侍讀學士徐瓊為南京太常卿掌國子監事 己巳陞侍講李傑為侍講學士仍舊清黃以九年任滿也 庚午陞編脩楊守陟為南京侍讀故事編脩等官秩滿無故陞南京者時李孜省既構守陟從兄應天府丞守隨因併及守陟云

二月辛未朔 丁丑命太子少保兵部尚書兼學士尹直右春坊右諭德吳寬為會試考官 癸未脩撰曾彥九年秩滿命陞南京翰林侍讀支從五品俸

戊子陞左春坊左諭德吳希賢為南京侍讀學士掌院事 賜故封侍講學士李淳祭從其子東陽援例請也

三月辛丑朔 丁未太子少保禮部尚書兼學士彭華以疾乞致仕許之賜勅賜白金三十兩寶鈔三千貫綵繡文綺衣一襲并勅有司月給米四石歲撥人夫六名應用仍給驛舟還鄉華入閣未幾而倏以疾去人頗快之謂其心險叵測李孜省之用事實華造端嗾使之然秘而不露其後孜省敗人始知所自云 戊申命兵部尚書兼學士尹直兼經筵官禮部侍郎

倪岳仍兼講官 壬戌陞編修教山檢討鄭紀俱按
察司副使提調學校山江西紀浙江 丁卯授第一
甲進士費宏為修撰劉春涂瑞編修選進士程楷蔣
冕屈伸袁達黃穆傅珪萬弘璧倪阜華恂吳儼李漢
仲斐羅玘蘇葵鄭炤歐陽鵬伍符翁健之李遜學鄒
智石瑤李充嗣唐希介蔡杲毛紀劉丙任儀閻价揚
廉潘楷三十人改為庶吉士讀書命左春坊右庶子
汪諧左春坊左諭德兼檢討傅瀚教之

四月庚午朔 癸酉右春坊右諭德陸鉞服闋復任
丁丑太常卿兼侍讀學士王獻卒獻字惟臣浙江仁

和人甫弱冠登景泰辛未進士改庶吉士讀書授編
修預修寰宇通志成陞修撰秩滿陞左春坊左諭德
兼脩撰庚寅充日講官壬辰陞學士明年賜金帶預
脩宋元通鑑綱目成陞少詹事兼學士戊戌 皇太
子出閣日侍講讀預脩文華大訓成陞太常卿兼侍
讀學士獻少美風儀性穎敏書一過目即強記才氣
飄逸詩文多可觀與大學士商輅有連同列見其日
講意有柄用之漸與之爭進造為曖昧不根之語以
暴揚于內坐是不得起掌院事十六年奄奄不得志
而卒訃聞賜塋祭如例贈禮部右侍郎子寔有廢疾

以從子雲繼其後錄為國子監生 壬辰陞編修劉
戩為侍講以九年秩滿

五月庚子朔 丙辰賜養病太子少保禮部尚書兼
學士彭華誥命時華已得請還家於途次聞朝廷上
皇太后徽號加恩遂具疏援例為請許之 戊午工
部尚書謝一夔卒一夔字大韶初冒王姓江西新建
人天順庚辰進士第一授修撰修 英廟實錄成陞
左諭德又脩續通鑑綱目成進學士未幾擢禮部右
侍郎陞工部尚書年六十三贈太子少保賜祭葬一
夔為人和易平實與人交久而益親尤篤于友義為

謝一夔卒

文不奇詭雕刻為諭德時嘗陳五事言頗剴切惟違
舊制乞妻三品祭葬與尹直沮都御史閔珪奏江西
盜賊多京宦大家佃戶因調之廣西尚書之驟得李
致省之力清議不無鄙薄云

七月戊戌朔 庚子陞編脩劉震為侍講以九年秩
滿 甲辰編脩江瀾乞歸省親許之 戊申以英國
公張懋保國公朱永襄城侯李瑾慶雲侯周壽新建
伯譚祐少傅萬安少保劉吉太子少保尹直吏部尚
書李裕戶部尚書李敏為正副使冊封第二皇子祐
杭為興王第三皇子祐楡為岐王第四皇子祐楨為

益王第五皇子祐揮為衡王第六皇子祐樞為雍王
已未少傅兼太子太師吏部尚書華蓋殿大學士萬
安以一品官九載滿 詔陞少師兼職如故仍兼大
學士俸降 勅獎諭之安上疏辭免畧云少師乃古
弘化之官而二俸兼支又 先朝優禮重臣異典臣
愚何人可以應此念臣自入閣殆經廿載今已七十
衰年猶日勉強事事不即自引乞休者以義在委身
事君不汲汲去國懷鄉為自安計耳誤蒙進階三孤
之首兼支五品之俸叨此望外之榮伏望撤還新命
庶弭衆口妄冒之譏 上批答云卿才識老成朕所

倚毗茲以年勞陞秩加俸宜勉就職不允所辭

八月庚辰 上不豫 甲申命 皇太子暫視朝于

文華殿 戊子 上大漸召 皇太子至命早即皇

帝位敬天法祖勤政愛民與凡國事之切要者誨諭

備至太子頓首受命 己丑 上崩壽四十一

九月辛亥朔 壬寅皇太子即皇帝位詔赦天下以

明年為弘治元年 戊午內閣大學士萬安劉吉學

士尹直各奏乞致仕 上曰卿等歷事 先朝輔導

有年朕今嗣位方切倚任宜勉盡職務成治理所辭

不允 辛丑陞編脩王鏊為侍講以九年任滿 甲

成陞戶部左侍郎王僎為南京戶部尚書南京吏部
左侍郎黎淳為南京工部尚書

十月壬午朔 丙子五更有大星飛流起西北百東
南光芒燭地蜿蜒如龍朝宁之間人馬辟易下詔求
言庶言士鄒智上疏言星變見於朝廷蓋陽不能制
陰之象也宜進君子退小人正天下當自內閣始少
師萬安恃權怙寵殊無厭足少師劉吉附下罔上漫
無可否太子少保尹直挾詐懷姦恬無廉耻皆小人
也南京兵部尚書致仕王恕素志忠貞可任大事兵
部尚書致仕王竑秉節剛勁可寢大姦巡撫直隸都

鄒智

御史彭韶學識純正可決大疑皆君子也然君子所
以不進小人所以不退豈無自哉官者陰主之也願
陛下法 太祖以待宦官法太宗以任內閣則君子
可進小人可退而天下之法成矣夫豈不知刑臣之
不可弄紀綱哉然一操一縱卒無定守者正心之功
未之講也疏上不報 丁亥少師兼太子太師吏部
尚書華蓋殿大學士萬安再乞致仕 上曰卿事
先帝及朕効勞年久正宜倚任乃累疏乞休特先致
仕仍給驛還鄉有司月給米五石歲夫八名應用以
御史姜洪湯鼎庶吉士鄒智相繼論劾也 癸巳命

吏部左侍郎兼學士徐溥入內閣叅預機務科道交
章劾奏大學士尹直吏部尚書李裕右都御史劉敷
右副都御史丘昂禮部左侍郎黃景皆與李孜省同
惡相濟奸邪貪黷掌國子監事禮部右侍郎丘濬掌
尚寶司事左通政李溥右通政陳琬太僕寺卿李溫
少卿林鳳俱昏庸誤事奔競無耻乞明正其罪或罷
歸田野以為人臣不忠之戒 詔直等皆 先帝簡
任朕初正位須用人理辦庶務爾等何為劾之仍令
直等各盡心供職勿生嫌疑

十一月丙申朔吏部左侍郎兼學士徐溥辭內閣之

命且乞致仕 上曰卿學行老成特茲簡用所辭不

允 太子少保兵部尚書兼學士尹直再乞致仕不

允 辛丑吏部尚書李裕以科道論列乞致仕允之

李孜省常援裕為族兄弟故驟至進用 甲辰內閣

大學士劉吉再乞致仕 上曰卿學識老成操履端

慎朕方倚任不允休致 乙巳編脩劉忠丁憂服闋

復除原職 起致仕南京兵部尚書王恕為吏部尚

書改南京兵部尚書馬文升為都察院左都御史南

京禮部尚書耿裕為南京兵部尚書叅贊機務 庚

戌禮部尚書周洪謨上疏言御製各寺觀碑記及遣

祭諭祭各王府并大臣文字代言之臣多有用字訛
謬者宜令改正以示將來又近日撰先帝謚議者
有陰寓詆毀之意宜速治萬安等罪以為人臣欺妄
不忠之戒上命六部都察院通政司大理寺同翰
林院會議以為洪謨所奏止是摘摘文字一二異同
非有關於朝廷大經大法使其言皆是亦何補於治
况言多紕繆徒為煩讀上曰御製文字既考據不
差周洪謨偏執淺見妄肆詆毀本當重治姑貸之仍
罰俸兩月

十二月辛亥朔癸丑吏部左給事中宋琮等言比

因兵部尚書兼學士管官尹直等奸貪不法奔兢無
耻臣等科道官交論之皇上已令尚書李裕都御
史劉敷致仕去臣等竊以尹直及禮部左侍郎黃景
奸貪奔兢比之李裕等為甚如進士李文祥御史湯
鵬姜洪庶吉士鄒智及南京十三道官相繼論奏此
可見好善惡惡天下之同情也且尹直自南京轉任
兵部以至入閣黃景自部屬陞任通政以至侍郎未
嘗一經推舉其附託奸人而進不待辯說而自明矣
上曰爾等言是尹直黃景既進用不合公論直令致
仕給驛還鄉景冠帶閒住特論快之乙卯勅吏部

少保劉吉陞少傅兼太子太師吏部尚書加俸一級
大學士如故侍郎徐溥陞禮部尚書兼文淵閣大學
士 陞少詹事劉健為禮部右侍郎兼學士入內閣
叅預機務少詹事兼侍讀學士楊守陳吏部右侍郎
右庶子汪諧左諭德程敏政俱少詹事兼侍講學士
左諭德傅瀚陸欽左中允周經俱太常少卿兼侍讀
侍讀學士李傑左庶子仍兼侍讀學士右諭德謝遷
吳寬俱左庶子兼侍讀仍加俸一級侍讀董越侍講
王臣俱右庶子兼侍講太常卿兼正字謝宇工部右
侍郎掌通政司事錄青宮舊勞也 丙辰大學士劉

吉徐溥學士劉健上疏辭免新命 上曰卿等學識
老成效勞有年特茲陞任所辭不允 陞掌國子監
事禮部右侍郎丘濬為本部尚書掌詹事府事吏部
右侍郎劉宣為本部左侍郎濬嘗撰大學衍義補具
表上進 上曰覽卿所纂書考據精詳論述該博有
補政治朕甚嘉之已陞職尚書仍賞銀二十兩紵絲
二表裏其謄副本下福建書坊刊行

十二月丙寅朔 庚午以即位遣右春坊右庶子兼
侍講董越工科右給事中王敞充正副使頒 詔于
朝鮮國 翰林院侍講劉戡刑科給事中呂獻充正

李孜省犯于獄

副使頒 詔于安南國 辛卯陞左春坊左諭德管
國子監司業費閭為祭酒 李孜省死于獄孜省江
西南昌人初為吏待選京師成化丁酉因太監錢義
柯興以祈禱術見 先帝試之驗傳授太帝寺丞言
官劾之改上林苑監丞未幾傳陞通政司右通政賜
金冠法劍各一圖書印二文曰忠貞和直曰妙悟道
玄有所奏請用以封進孜省又曰採取符籙諸書以
獻寵信日隆八年間官至禮部左侍郎掌通政司事
恃恩驕恣有忤已者必害之工部主事張吉兵部員
外郎彭綱刻之皆被謫孜省益自肆遂讚吏部尚書

尹旻及其子編修龍所與往來太僕少卿張璠給事
中秦升工部侍郎談倫主事王範翰林侍講學士焦
芳脩撰曾彥編脩王敕司經局洗馬羅璟禮部郎中
劉紳員外楊榮吏部郎中鄭宏兵部郎中鄒襲等並
以次謫降士大夫皆畏之亦有陰附以媒進者於是
致仕副都御史劉敷為左都御史禮部郎中黃景為
左通政南京禮部侍郎尹直為兵部左侍郎工部尚
書李裕為吏部尚書通政邊鏞為僉都御史李和為
南京戶部左侍郎其同僚通政司叅議元守直張璠
陳琬俱進秩品又採取時論所推若學士楊守陳少

詹事劉健都御史李敏侍郎李嗣大理卿張錦少卿
馮貫及吏部侍郎徐溥學士倪岳南京國子祭酒劉
宣通政黃孔昭左都御史余子俊等皆密封推薦縉
紳之進退多出其口人亦無敢言者矣攷省已戍邊
衛遇赦當還太監蔣琮言攷省罪大不當赦復械繫
至京下錦衣衛攷省不勝楚掠至是死

館閣漫錄卷之六

終

